

越縵堂詩續集

越縵堂詩續集第五卷

清會稽李慈銘愛伯譔

姚安由雲龍變舉編

己卯元夜敦夫敦叔仲彝子縝小集寓齋

上元風日入春妍開徑停雲小啓筵貧裏杯盤三韭足客中燈月一家圓
閒身因病能無事佳節占晴喜有年爲想傳柑宜宴罷漏聲隱隱鳳城邊

賀伯寅擢御史大夫

漢廷亞相繼三公首陟臺端一品崇獨坐舊居中執法六官仍莅少司空

君於甲子乙丑間以副都御史鑒工部右侍郎及今擬總憲仍攝工部左侍郎皆以山陰事也蘭陔日映宮袍紫蓮炬春

回苑樹紅自有清名驚百辟不須白簡已生風

花朝夜飲霞芬新居

驕驄扶醉趁花朝來扣銅鋪月上梢深院漏聲通密坐畫簾燈影定新巢

倩顏上酒春紅重纖手藏鉤輕玉交似此良宵暫行樂銀屏咫尺忍輕拋
己卯三月三日偕敦夫禪盦子縝集城南龍樹院餞仲彝之官吳中

子縝有作卽和其韻

銀鑿翠鏡向城闌暫緩驪歌拂鈿塵魏晉清游三日例京華佳事曲江春
尊前草入池塘色坐畔花依鏡檻人爲說渡頭桃葉近湔裙重待玉河濱

時子縝隨人將至有聞
三日游極樂寺之約

同日禪盦復以詩見貽再和之

城南游屐歇經年爲選良辰作祖筵風動葦間明積水山斜堞影入春烟
醉鄉漸覺花枝老歸路愁看草色連絕憶全家上河日夕陽蕭鼓郭門船

余家舊事以是日詣木客山上高祖塚山與
闍亭連君詩末聯憶觀亭之勝故述所懷

送仲彝試令江南二首

送君此去試鳴琴春水桃花別思深羣從才名俱國用中年出處總親心
九科匡鼎知非計匹絹胡威好嗣音自古江南游宦樂不須手版歎浮沉
大府爭求汰吏方近傳明詔罷賞郎澄清漸見官師肅撫字尤資牧令良
幸有寫書傳治譜莫嗟捧檄滯周行懸知十畝公田稻猶勝侏儒羨一甔

己卯清明後大雪連日積素平階有生所未見也賦此柬故山諸子
清明三日雪大作積曉寒光滿簾幕乳鴉雛鵲噤不聲稚杏夭桃凍回萼
垂垂花樹誠可憐先生亦復翹吟肩敝裘久已付質庫天公相戲毋乃頑
方今復土戒行早萬乘三宮急馳道頗念春雷千夫戰欲使橋山一時綽
我思鏡湖春水生柳花如雪飛江城上山杜鵑下山齊籃舁簷舫隨處行
辭家作官計誠拙執戟虛名不堪說拋卻一畦田水聲來看西山暮春雪
案頭種麥一盆青青可愛水仙紅梅亦尙有花者以山桃雜插入瓶

中作詩簡同志諸君

種麥在盆盎入春葉漸舒青青作方罫日日勤澆濡頗覺几案間田野漸
可撫水仙雜絳梅玉佩揚羅襦數枝擢晚秀歷久彌妍腴山桃亦已華紛
插盈瓶盂絕代本難偶異質各鮮敷席視函尺地粲粲環名姝古書相映
發暗香風與俱靜驗生意足默推物候殊和氣一以感泯然化榮枯爲諗
素心友存養今何如

寓庭今年花事極盛得絕句四首

六年栽樹幸今成紅紫濃香各擅名爲照主人頭似雪夕陽相映更多情
常擬娛親闢小園卜居難定一枝安卽今半畝垂垂朶不及閒居奉母看
迴環小徑綠生莎別占春風錦一窠贏得隸人沿路說冷官無事種花多
海棠粉褪柳絲斜一樹穠桃爛似霞蜂蝶不知人迹斷也尋花事到貧家

己卯看花絕句二十四首

北地由來不見春今年置閏恰當辰
百花次第三句發特慰黃楊劫裏人
爭說千官扈蹕回田盤馳道百花開
杜鵑一樹斜陽裏獨向蒼梧泣血來
閉門高枕有何功同是無私雨露中
閒卻裁量今古手年年種樹課春風
珠崖潘叟古獨行十年長我謀歸田
先春豫約游諸寺病過花時更可憐

初調
題

閏重三日嫩晴開先向慈仁結隊來
幾樹鸞枝紅艷裏夕陽和影落茶杯
西直門西輦路長獨垂鞭影過高梁
寺門未到春塋綠時有雛花出短牆
海棠百樹列東西紅萼千枝點綴齊
誰識畫廊迴繞意獨來花下解偏提
晨旭猩紅萬點葩夕陽漸展碧城霞
不須羯鼓唐宮法一杵齋鐘已放花

是日以亭午至極樂海棠開者僅十
之一二哺後回車已十放四五矣

梨花片片落蒲團一樹輕籠佛院寬似此不生閨閣裏無人月下倚闌干
六角空亭半畝荒山烟塔影入林光蒼深大有江南意獨背花枝看夕陽
西有極樂東花之祇林雙樹繫我思質衣又僦草驢去十日不出嫌已遲

日讀
堪

韋公柰樹記前朝鹿苑春風事已銷獨有沉香傾國種年年彈淚濕紅綃
高度金輪足十尋花身量比玉杯深端相恨乏邊鸞手寫上吳孃軟繡襟

都中海棠家以千葉爲貴花開極闊漫時大皆如盃盤粉吹脂宜
於靜玩靈家所未到也花之寺佛殿左右兩樹尤爲京師之冠

出寺蒼然對遠山鳳城又見折花還獨行理詠平生慣不似今年此日閒
再向慈仁寺裏游夕陽庭院足勾留丁香夾徑清陰裏如雪花枝照白頭
隱几清風松下生偶來鳥雀絕人行花陰一縷茶烟綠剛與諸天界晚晴
細數名藍白紙坊頗思排日遣春光棗花法帖長椿畫誰炷鑪香坐梵房

崇效寺本名聚花寺汪容甫所得定武蘭亭開僧藏寺中前年訪之僧
聞不肯出僅見其紅杏青松圖卷長席寺方丈懸明孝純太后批盧之像寺僧
尚有訛者一軸及九蓮菩薩一對門約共訪寺僧亦秘之嘗年
嘗以劉侍耶歸寓寺之對門約共訪寺僧亦秘之嘗年

爲約明朝共送春撫琴動響宋無鄰沈公與馬成雙擯莫向淵明覓酒人
欲賈東鄰下澤車天寧去探牡丹芽山姬爲語春衣盡且自關門數落花
手種朱藤一架餘葳蕤深鎖子雲居清香滿院無人至日坐花間勘異書
消得餘春十日閒古閑切綠陰如水動輕紈不須乞米還書帖一頓藤花足
飽餐

紅藥豐臺盡入城滿街喧聽賣花聲亂書堆裏香重疊插徧癡壺折腳鐺
每怕花時風雨侵及今花落盼甘霖祈年共有蒼生望豈獨關心到綠陰
長日閒居待細論李桃結子竹生孫一年花史編詩訖朝事從他到耳根

山谷生日偕敦夫子縝鼎甫諸君小集

涪幡一去不可期文章風節百代師我非辦香心實儀敬公行事歌公詩
年年生日當炎曦誦公詩句清心脾龍井綠茗槍一旗洪州雙井相等夷
荷花坼坼開紅衣西瓜脆切黃琉璃蜜桃盤大流瓊脂雪藕片片靈玉犀
佐以山陰酒一卮篆香漾漾吹明漪恍見惆悵來須眉嗚呼騎鯨天人姿
城頭濯足揮手辭八荒被髮隨敖嬉小桃源口鞭文螭朱幡清潁遙逶迤
我勸公醕公應知薦無百蠻酸黃齋客無襁襁病夏畦高談清詠公所怡
願公松扇攜高麗風鱸石研隨事宜綠陰戶牖藤一枝艸堂謾謾生涼颺
神之歸兮賓亦飢小庭丁倒陳盤匝紫薇花影相猗靡雞臠水餅烹黎祁
明月穿樹映淖糜力貧一飯誠難希明年更憶今年時

己卯歲鄭司農生日作

己卯溯炎漢先生去冀州一年隕喬嶽

鄭君卒於建安五年庚辰時已以病自乞還家爲宣慰所逼載病至

元城縣計先一年已卯正由袁紹所被徵為
大司農給安車所過遠迎蓋已去冀州矣
千古障洪流獨抱遺經感常

深老病憂秀眉如可見寤寐此生求

題順德梁福草封翁九圖仿鄭所南畫蘭冊二首

老筆出塵外閉門歌楚些天懷想高澹詩思見萌芽空谷琴能語香叢石

是家應教五嶺畔不長素馨花

梁君自號十
二石山人

思肖不畫土高風無與儔承平根久著入烟墨外何求海上夷花怒庭前

帶草幽誰將千畝菑自比富民侯

梁君為揭陽縣少卿世寶之父素以詩名
有入倫鑒觀希學士文田幼孤貧甚一

見洪其不凡為飲食
誨之今年七十餘矣

哭孝仲六首

一別相思日百回隔年竟慟訃書來抱經心苦宜遭忌與我情親亦召災

差幸餘生見妻子并無閒福臥蒿萊一身老病知交盡似此窮途倍可哀

去年寒雨出都城我亦沈疴輟送行常恐眼前成死別相期夢裏話平生

君去冬來曾自歸後無日不夢到余家百年遂盡論交分萬語難窮感舊情愁絕草堂燈火

下照君形影尙分明

拙宦長安百病支廿年筋力盡奔馳無田豈識生還樂薄祿翻深戀闕思

寂寞官衙題素旆叢殘手稟付孤兒六書訓詁千家譜都是春蠶未盡絲

君於說文若雅及人物氏族經籍掌故之學尤所致意而書皆未成

人仇鬼嫉待如何憤世孤行歷轍軻老受推排終不悔死羸涕淚亦無多

君計至其同年雨人某學士尙追怒君之不加禮九閩此事應難問一節傳君定不磨清議獨嚴

從賊律有人蒙面避搗訶同邑某翰林書受僞職而家富於貴鄉人多從之避爭爲之諱一日遇君座前揖君君叱之

曰若敢與我揖耶其人失色去

十年蹤迹最相親過我從無隔一旬各媿天倫懷隱痛互期學問慰長貧

深談每苦宵晨促脫粟常誇飲饌新君過余必留小食君輒以爲郡中莫及也誰分履綦從

此絕頗聞驚歎到家人

匡中準備寄新篇其有說經文二首方擬以草稿寄君而君計至蘭蝶生涯

先自了夢蟲心事更誰憐千番手札看淒絕一束生芻尙缺然後死銘君

前諾在并將老淚達重泉君於余一言一字無不欣賞嘗謂此生無它求死後乞爲志銘耳

寄懷程雨亭太守鎮洛江寧去年以母老由吏部郎改外

一辭神武走江關羞老山公啓事間將母錦帆千里舫迎人手版六朝山

卽看真摯論交獨莫道循良作吏艱家法上元遺愛在勉持清白起痼瘵

答雲門自春中連得瀝上書今未知消息

萬里秋風起索居遙思樊子益愁予小山叢桂三年別春水桃花二月書

鴻雁久遲君怨否江湖覓食近何如柴薪論語都無有東冶何勞賦鰥魚

信仲彝銜恤歸夷陵將謀返越

彝人安軒太守病中望仲彝歸甚切及仲彝抵吳門而太守已歿於楚矣

捧檄勞勞未息柯星奔徒跣越關河零丁慟絕中塗帖思子傷心遠道歌
吳祐寫書寧有恃皋魚帶索待如何君家兄弟相關甚重感孤生廢蓼莪

六月二十一日歐陽文忠公生日偕敦夫汝翼從僉子縝紫泉小集

漢後文章韓歐陽羣兒毀傷毋乃狂月宿南斗日無考究公月日言能詳
公之說詩吾無取公疑繫辭毋乃魯獨有師法契康成搜剔叢殘出詩譜
立朝大節尤嶙峋韓富文范相比倫政事輝映已千古風流徧被人寔春
鐘鼓清時暫行樂叶閒情遺譜墮釵曲荷花深恐驚鴛鴦卓英今猶夢鸛
鵲有琴一張酒一壺銀槍捧盞我亦無坐中不乏蘇梅徒公今不樂胡爲
乎

七月三日獨游十刹海荷花已盡小飲酒樓還至金鼈玉螭橋看花

作

數月不出轅局駒花期負卻紅芙蕖連旬不斷濯枝雨汀洲夜泣千明珠
蘭秋三日旭始曉亟走柴車北湖道亭亭翠蓋迎人來兩岸垂楊收稜稻
悄然獨酌湖之濱湖光俯照青帘新金銀歷歷見宮闕蓬萊縹渺疑無人
回車更沿苑牆去宛宛玉虹隔烟霧朱華掩冉波中央艷帶斜陽尙無數
瀛臺瓊島望中過水殿遙聞笑語和賦詩馬上何年少祇覺風光天上多

仲弟再周忌日夜坐聞雨作

逝者不可作歲月忽已積音容漸以渺形骸去空宅貧賤難家居出門若
驅迫別爾已傷心況今泉下客除服倏踰期悲懷耿猶昔質衣營一翼蕭
寥具肴核冀爾就形影無爲餒魂魄顧予日就衰五十髮早白同氣無殊
稟豈能久駒隙徒抱家國憂疾疢苦百役長安秋氣深荒巷斷行迹槭槭

雨聲至一燈澹將夕遠聞鴻雁聲念爾獨何適幾時歸計成買山面林澤
葬爾先隴旁列隊樹松柏其前環丙舍安予嘯歌席首邱庶可遂神理應
不隔百年歸有期嗟痛亦何益

夜夢經會稽明桑邨見秋山紅樹其實邨本無山也

久與故山別秋來鄉思盈夜夢里中出漾舟東北行言過明桑社一樹霜
華晴艷逾春葩發綺映丹霞明左顧一山起立水如相迎秋林粲以峙青
黃雜鮮頰圖畫豈云過仙區亦難名越中谿山美東南靈秀并平生烟霞
懷此地非所營胡爲人我夢巖壑生幻情外家澄湖壞去此三里程幼少
屢經過邨落多紆縈臥或枕母膝識此雞犬聲壯歲事游宦慈蔭悲俄頃
諸舅久凋謝門戶委棘荆廿年絕行迹寤寐常怆怆馬山不可見園林有
餘清眼前得此境淒然傷我生

馬山鎮名在明桑陰家據之同相俗鎮
中隆慶寺山下有石脊起卽其山也

縣志馬山橋在縣東
北二十里二當作三

簡同人爲西山之游

倦客厭塵境秋色歸名山一陘太行秀西作神京環其中富巖洞精藍宅
金仙清谿絡潭柘高樹表戒壇時見白雲出相與飛鳥還頗聞祕魔崖楓
檨交黃丹鐘磬出其下微露斜陽殷偶聞踏葉聲一二歸僧閒棲心宿此
境密坐闌飛泉尋幽乏濟勝卽此堪躋攀香山與翠微了了林麓間爲語
筇屐侶惜茲烟景鮮

秋日對雨追悼牧莊之作

積晦淒素秋變霖續晨雨去靜對空齋中蕭條數庭樹落葉漸彫平寒卉
尙籬護露洗覺簷低閒澹得窗曙偶聽寒鴉過時見流雲度焚香黯經帷
幽獨此焉處素書空復披塵琴積已故言念平生歡開徑幾人與張子獨

余愛時時枉芒屨風雨聞敏門豈然識君步析疑鉤幽深搜遺權譌誤紛
綸十經義覲縷百家注得理無游談深衷絕浮慕頻見墮燈燼亦或設寒
具流淖交九衢笠屐自來去何期斯人亡予懷復誰許默學爲世尤力貧
亦天妒宋寥虎賁飲悽惻思舊賦敢云達者希孰識靜中趣滴歷蓬蒿深
惆悵閒庭暮

包英姑歌

諸賢人包立身妹也署浙江巡撫布政使蔣益澧疏言包邨之破
英姑偕立身同戰死馬面山辛酉壬戌間余在京師不知其詳今
年己卯客有談英姑事者作此正之而立身事亦附見焉

包家有女名英姑娉婷二十頗有餘纖纖玉臂彎雙趺生小不著羅綺襦
朝汲澗中水暮爨山下蘇包山一邨外不識陌與衢解一一朝狂寇沸江汜

先屠郡縣次鄉里彈丸一邨毒烽指百萬連營貌與兇阿兄奮呼裂裳起
悉集纓矜誓諸市市人謹言各效死豈有城與墉環以六尺枳豈有濠與
隍塹以一蹄水兄力拔山衆所恃妹從兄兮力是視解二夜縫戰士裳朝作
軍中漿出門驅賊如驅羊阿兄巨刃摩天揚小妹雙刀明月光甲綰茶白
繡襦襦揮刀先後如雪霜紛紛頭落千貪狼血滿襖褶不洗妝歸來語女
伴照水勻鴉黃盈盈入門去上膳耶與孃解三東安忠義各分伍桓桓四營
悉貔虎阿兄統領四軍主妹領中軍督所部壬戌五月賊大舉礮火殷天
矢如雨兄呼妹言亟集旅北當賊衝賊所聚我扞其北落賊距東西南面
屬之汝阿妹聞兄言嘯隊齊出堵是好男兒死此土有不出者視我斧解四
赫赫炎曦燒火雲撫循保壁恃一軍崎嶇晝夜無停奔弓足戍削曳布裘
出不騎馬入守門渴無水飲飢無殮忠義苟不失辛苦非所論解五賊尸

蔽野血漂筏賊圍幸開女力竭矢石不死死以喝耶孃已終女事卒語兄
好爲視無忽是爲穆宗元年之六月青山一坏首埋骨兩旬邨破氣冲李
血海屍林莽同窟使者入告女戰沒死非女重事當核我作此詩補貞碣

解六

傷逝四首

爲謝給事增阮刑部福昌楊工部仲愈家兄刑部國彬作也四君
皆於今年夏以次物故雖輓迹不恆情好或異然親故之感不能
已也詩以傷之非特使其名見亦以歎老死之易耳給事字孟餘
儀徵人刑部字孝林會稽人工部字子恂侯官人家兄字雅齋大
興人孝林年最少而有志於古其死尤可惜也

黃門吾老友廿載不遷官玩世諷諧熟求人面目難中年登上第早歲列

詞壇學佛窮途事生天亦未安

不見阮生久清狂一代才忤人因笑罵養母竟蒲萊舊恨榮瑤瑟奇書探

玉杯霜純金碧畫展翫有餘哀

孝林善畫為余願作工細山水三事至今藏之

楊生少予二擢第盛年時揮斥萬金盡疏狂四海知平生多狎妓餘事亦

為詩與爾稱兄弟先凋倍可思

子伯玉戊申登桂侍郎為腐勸官素稔其疾時宛平王登桂侍郎為腐勸官素稔其疾

邪縱酒播其小疵劉倅一科次年笑玄選庶常假歸久不敢入部十餘年散館改工部皆以薄遊累也

與兄為親免己丑歲同生同職賞郎籍同題乙榜名杜門憐共病無子各

傷情垂死不為別忍聽殘泣聲

雅齋病篤時妻致聲余為延醫竟不果而過致遺不相見者五六年矣嘗三夢獲卒

無子其今婦去年新娶與余納席姬同日年甫二十餘也

續傷逝二首 有序

余於八月之末著傷逝詩四章逮九月至今鄉人來言余輝庭舍

人以八月十九日歿於家王杏泉教諭以十一月三日歿於鄞學署二君皆余中表也老病日至同輩盡喪卽有歸田之日已無過從之人悲哉更爲詩以傷之蓋以寓話舊於弔亡冀通魂於來夢也舍人名恩照乙卯舉人教諭名英瀾紹興府學廩貢生皆會稽人

昔我先王母於君實祖姑舊姻比盧李修好異程蘇田宅勤增業文章老識塗生年同甲子強碩竟先祖

王子族親黨先余生十年知交同肺附貧病益周旋有子才能傑儲官老不遷訃音相逮至獨立倍潸然

觀宣府伶人侯紱珊演仕女圖劇

髻髻登場百媚加柘枝鼓趁舞腰斜翠裙宛轉籠初月珠綴玲瓏罩薄霞

差似祕圖張素女頗傳宮體出唐家六朝金粉飄零盡獨出胭脂塞上花

臘八日大雪中獻之走使惠銀賦謝

故人辭劇縣索米學山郎佛火依禪榻詩情到雪堂

獻之黃州人去介休令爲鄆城人東僭寺

高風能念我廉俸爲分糞欲款松關夕同參魚粥香

竹簣自蜀中奉使歸厚致饋歲賦詩奉謝

文章銀筆冠南州特簡掄才擁蜀轡使節回瞻金闕雪歸裝清帶劍門秋
頗聞珊瑚無餘士賸有瑤筐軫舊游自是相如今渴甚一杯露抵錦江流

冬日坐弢夫齋頭偕汝翼雲門茗話

短晷衝寒出圍鑪話倍長虛窗收日煖小室養花香世事閒能樂交情淡
可常茶烟如有意故故繞書牀

弢夫雲門冬日饋海棠

九衢積雪冰嵯峨誰開紅錦春一窠層城忽見玉妃笑頓覺天宇圍緋羅
朱鳥窗深綠綺戶阿環翠裘弄冰筋三郎枉自夸天公雨點催花亂擲鼓
巧工能奪造化奇兩君嗜奇爭典衣竭來買送簞門下窺牆驚集鄰家姬
袁安僵臥得奇福貯此傾城乏金屋終朝平視更夜看爲滅鳥薪買紅燭
十二月十五日邀汝翼敦夫禪盒弢夫竹簣雲門夜飲草堂是日敦
夫生日前三日爲弢夫生日汝翼禪盒雲門生日亦相先後因用
東坡集中子由生日詩韻柬諸君

老梅入雪揚天芬松柏耐凍含麝薰歲寒盍翫冬心羣上下相逐龍與雲
環視萬木禿若焚山烟欲凝水不紋奇榦鬱糾枝葉分能令天地迴氤氲
中年求友得數君高談瀛海羅典墳各以所得抒爲文世士語言等鼃蚊
旁探萬類窮魂云不願燕然山勒勛不羨黃龍馳水軍五千卷軸各自勤

歲晚治酒相歡醺欲歸亦無田可耘且借帝里爲榆枌華鐙四照花繽紛
廬兒行炙椒桂煑醉歌喝月天應聞

謝敦夫太史饋歲酒二首

溫克如君少醇醪不待沽爲予澆磊塊傾意佐屠蘇小戶經年足春筵有
客需祇嗟張竦逝無物潤黃壚

謂牧莊不飲而盡致余佳釀

故里城西社衡門對水開市橋茶幔隔江驛稻船來何日歸三徑相從倒

百杯山陰家釀法焦杜不須推

山陰酒始見梁元帝金樓子君家舊釀故云

歲暮得子縝長沙書

簪豪珠玉動明光持節承恩下九閭使者星輝聯越嶠

君與曾夫庶子交代

美人秋

思屬瀟湘

君湘人

皇華驛遠詩瀕寄

來書言道中懷余詩頗多

蘭芷箋傳字亦香自

古楚材詞賦地好羅屈宋在門牆

己卯生日敦夫汝翼禔盒弢夫雲門諸同人攜酒枉過醉後放歌

我生總在憂患中五十倏過頭已童石槃鑽木百不遂止坐骨相生奇窮
平生幸得文字友一聞叩門笑開口歲寒落落千尺松世夢沈沈一杯酒
生日俯祝古所無況我龍鍾丁蓼荼強排積慘謀暫樂欲噓春氣迴窮途
長須埽門雪堆屋凍雀驚飛亂穿竹行廚賂驛酒滿缸壓擔肥羊白如玉
金絲鱸鱖鯨鮪須王鮪萬里行頭顱旋脯盃錫琥珀凍鴨肪裹穠琳琅腴
腐儒十年菜園腹百饗一豆萬緣足豈從閔叔求豬肝卻笑杜陵殉牛肉
君不見北門相國操璇璣年年上壽開黃扉珠履未散漏將盡尸居瑟縮
同雞棲西郊冢宰亦當軸三日後堂恣絲竹彈章一紙天顏嗔匿景仄行
學藏六又不見御史大夫解貴疆連天椒碗皆金張虜廷屈伏比良嗣朝
議爭欲烹宏羊一朝銀鐺入請室婢子丁寧挽衣泣卻思伏臘田家歡踴

闕薑蘭俛銅歷吾曹不結君房交子公亦無趙李相過從嫺然霜落萬木
表猶能嫵媚生春風眼前玉壺自傾倒緩帶輕裘盡英妙坐看紅燭高花
摧四照屏風玉顏笑諸君通籍蓬萊宮金門遊戲從衰翁努力早用彭祖
杖同探王母桃花紅

越縵堂詩續集第五卷

南風
雄翰飛校

越縵堂詩續集第六卷

清會稽李慈銘愛伯譚

姚安由雲龍夔舉編

庚辰元日試筆

麗日朝正啓九閭中興宣廟繼神孫孤生得見猶爲福晚景無多怕受恩
京雒衣冠元會盛故鄉耆舊幾人存自慚斗食干官末誰發盈庭白虎尊
庚辰正月二日書春勝

光緒六年歲在辰四夷賓服職貢均蠡茲鄂洛頑不臣皇恕一怒雷霆震
首誅共驩息囂闔天戈所指罔勿馴六合清寧無堦垠鬼彪匿跡野馬湮
海帖波濤郊不塵和風甘雨雲械輪家給人足嬰陽春八紘羅俊歸陶甄
大庭對策言天人讀書恩遇超等倫主聖臣直上治臻高爵厚祿長子孫
庚辰元夜汝翼竹簀弢夫雲門襍盆敦夫諸同人集寓齋

百年此夜漏聲催折柬招邀舊雨來竹竈茶香宜雪後畫紗燈影見花開
清時禁陌稀歌管中歲貧家足酒杯猶有閒情賺兒女鄉風還說火楊梅

客去後小放花爆火楊梅見
乾源歲時記游杭之舊俗也

謝雲門惠怡邸舊造角花素箋用山谷次韻王炳之惠玉版紙韻

我家會稽萬頃竹露斫雲沈滿院谷拙工逐利失堅好杵搗千山不成玉
名紙所走萃都市溢廛間價轉華穀魚網厚韌出東澱蠶繭鮮明自西蜀
承平賢王有素尙獨裁新意斲冰幅不使纖紋侵行理小鑿樣花辨角曲
寫書實事此見端驕孫箇彈莫點辱翰林樊子惠我百欲試蛇蚓媿拙俗
承平視草老無分簪述覆瓿罕可錄何當歸去買五畝只種琅玕不藝菽
日求製法參玉版餉君詞源倒千斛

再題怡邸所造角花大箋

玉璽裁盈尺猶承若木華
盛時想清暇一事必名家
白睡明光雪紅妍押
角花摩挲文獻舊莫僅藝林誇

病起

病起閒難得溫尋茗一杯
南窗對晴日綳帙映紅梅
煖覺微香度風知隙
幔來此中有幽事覓句畫鑪灰

同年龍桐孫太守自歷下還津門歲暮辱書問卻寄

五馬猶聞按部遲
燕齊幕府老驅馳
析津互市天驕國
靈憲高談地動儀

君主四洋機器局事

赤手誰籌防海法
白頭難就買山資
金門執戟憐衰暮
多感梅

花寄一枝

昔昔鹽爲始寧婦作也

本序

余舊日庸媼陳者上虞人嘗言其鄰婦某事有可感者詩之以備

采風

妾家東山下門指上妃湖蔓草侵行徑垂楊覆路隅采桑從女伴汲水媚
清渠繫纓屬田豎擔酒入邨閭待年羞見面低頭日縫襦交年寧阿母上
堂告尊姑耀首飾銀璫稱身試總綸羣離自加景生恐塵土污纖纖束細
步崎曲屢踟躕何來里中郎狹路故相須妾非佩瑱子君豈援琴徒請歌
墓門鴟爲謝大夫車言辭不可說徒活切逼迫近曳摟自惟守禮嚴金玉豈
能渝轉計謂年少野田非所圖前溪有槃石團團蔭青榆藉此當短垣爲
爾解明珠語低氣益婉頰顏掠牙梳少年聞之喜促步不須臾急揚皓腕
力推墮夾陵瀆疾行返家去不敢迴清臚何期感悅彪竟作溝中枯父老
共驚訝吏卒日擲揄閱嘿自彷徨常恐人鬼狙因茲重約素履綦絕前途
橫鏡辭眉黛緘合謝脣朱良人漸成長花燭設青廬匹配幸伊始尊章旋

告徂藁砧忽見怒筆楚苦相驅妾身蒲葦初妾貌蓮花腴冶容匪云誨菱
荻自含蘂凶殘魏老生輕薄魯秋胡所遇幸非此薄命失歡娛力作甘笞
辱終不怨狂且

寄唁王子獻子詒兄弟

甬江天末渺生芻返葬山中望素車銜恤定知生孝重驚心翻怪訃音疎
百年盡有丘吾恨一卷期傳禮服書還問鄰牆相和哭東華西里近何如

謂牧莊之二子時與
子獻兄弟比鄰居

香山二月五日花下詩云二月五日花如雪五十二人頭似霜聞有
酒時須笑樂不關身事莫思量余今年五十二矣誦之有感亦系
以詩

人生五十還羸二惆悵香山今日詩老物尙爲羈旅客餘年幸及太平時

并無北地花經眼，賸有東風雪上髭。莫惜典衣謀一醉，此生能得幾銜卮。

庚辰花朝日作

踏青挑菜過逡巡，第二花朝接上旬。風帽猶看京輦雪，畫船誰占鏡湖春。
銀罌翠管嘶驄路，鈿扇紅裙撲蝶人。多少少年行樂事，不堪回首鬢如銀。
是日偕敦夫雲門兩太史尋歌賞酒逮夜而歸復用前韻

相攜羣屐遺韶辰，閒向城南步鈿塵。十隊鼓催銀鵲舞，一枝花占碧雞春。
新豐斗酒高歌客，洛下疲驢障面人。猶有風情燒燭看，特教明月逐歸輪。

送敖金甫郎中

明賢

還蜀省覲二首

卅年郎署厭華簪，一紙當歸抵萬金。白髮三朝違世好，

對京察三次保舉一等俱未記名

采衣千算樂山林。

八十年餘

寂寥冠蓋東門餞，繾綣江湖北闕心。正是聖明

憂國事，高陽徒侶惜分襟。

岷江春水正初生萬樹猩棠壓錦城千首詩篇充宦橐全家畫舫穩歸程
傳經同有商瞿祝守拙差希柱下名曾是薦雄文似者

君謨曾文正公淵衰

羸執戟不勝情

春夜飲豐樓酒家同禪盒敦夫叟夫招霞芬

新幟酒人家紅樓四面霞燈光添綺戶欄影出名花密坐香能隔虛櫺月
易斜金尊好顏色相與惜芳華

入城七日歸視寓園花樹示童奴

離家纔七日庭花多半開向人如笑語馴雀亦裴回暫時林下坐好風天
上來殷勤謂童僕莫便埽莓苔

竹簣邀同雲門飲花之寺晚遊白紙坊崇效寺觀智朴青松紅杏卷

二首

選侶城南出微風導遠林綠侵經院簷花隔畫廊深罨水緣鐘轉拳山受樹陰片時禪榻語應證最初心

夕照輕陰郭迴車訪棗花山門分野色經閣帶林霞香篆穿簾細旛風曳

柳斜摩娑紅杏卷觴詠想王查

卷中漁洋詩四首
初白五古一首

春盡藤花盛開日坐其下

手種朱藤本垂垂一架餘知余扶植意及爾長成初葉嫩侵甌茗花輕落几書時聞香掩冉風動綠陰疏

張中允

端州

備兵陝安索詩爲別

山南雄鎮古梁州特詔詞臣擁碧油鎖鑰平分秦地半文章高挹漢江流百函金匱勞增秩

以實錄國史敕
勞加二品銜

十隊銀刀靜運籌共道點蒼三戟貴棠

花卿月照征幘

謂令兄侍郎時督學正
浙張君震南大和人

偕嵒盪雲門心雲坐藤花下作

跋脚藤陰見主賓書牀茗几雜然陳他年定有高人畫一架樓花壓墊巾

五月七日引見養心殿是日甘雨如注恭紀

名場冊載號龐眉身是宣皇老秀才執戟久陪郎署列揮豪今見御屏開

驪珠一串承恩舊

是日因掛數珠

雉尾雙瞻映日回似說宮中歌得雨濟時誰繼

衛公來

紗袍一領是庚戌遊泮宮時所製服之三十年矣引觀被雨題詩志

之

藍紗一領製中單恰稱青衿弟子員千縷每循慈線迹卅齡還惹御鑪烟

芹香襲久痕猶在柳汁彈來色不鮮五十孤兒今釋褐宮袍欲換倍潸然

殿試賜出身後乞翰林院陳情還郎中本班五月九日得旨以原資

敘用感恩述懷二首

丹陛除書下郎曹許卻回逮親無薄祿溷俗便凡才白髮心逾短青雲眼
倦開一官寧自擇朝論恤衰積

敢薄承明選清華讓少年主恩容避席吾意在歸田魚麥平生悲桑榆夕

照天任他三島地百輩蹀飛仙

今年得館選者九十二人

答雲門見贈之作

蓬山路近又風迴多子新詩鄭重來幸有文章娛晚景倍緣時事惜人材
置身自愛循良傳緘口須防木石災

捐正月間疏事

我已陳情君改外暫時相

聚且銜杯

答曉湖聞余得第寄詩勸歸之作三首

本無仙格注蓬瀛廿載郎潛寂寂聲羞以質文隨後輩何曾虛譽到公卿

蛾眉已老人猶忌雞口能容世亦爭淹倒科名真失笑不圖知己尙關情
故園弟妹念奔馳屢信催歸未有期三世諸親多在殯百年過半尙無兒
微官投劾吾何戀老境侵尋事可知只惜君衰貧亦甚青山虛想耦耕時
霞川舊築已全虛卜隱重翻越絕書春雨花林宜水際夕陽霜葉近山初
首邱終在湖塘地息壤相從壽勝居曉湖所居名壽勝步更約城東老孫綽謂子歲
寒圖畫入樵漁

出榜後十日張子中同年自揚州馳書來賀以余久困名場謂當如
彭南昀王樓邨故事也時余已過殿試所對策頗爲時所傳誦都
下同人亦多援此相待事後追感作詩寄子中二首

虛期佳話繼姜王方丈仙人本渺茫得第漫爲同輩重上車羞逐少年狂
時文貶格猶難遇吾道孤行豈可常自有名山真事業相期歸老課耕桑

一官鹽筴滯揚州手版衙參得自由郭外烟花連畫舫月中歌唱滿紅樓

雅書自守張曹學國計誰居晏信儔

君精六書五經之學以湖州人為揚州鹽官故以雅讀曹販及包功正為

比曹揚人也多負故鄉荷菱好道場山映雪溪流

弔王子詒秀才繼嚴并唁其兄子獻有序

子詒吾友杏泉第四子少好學善文辭補紹興府學諸生去年父

病禱於神乞以身代父竟卒今年三月母復病復以身禱母少瘳

遂費疏自投寧波郡城月湖中死實庚辰四月五日也年二十九

女貞一樹玉無瑕

子詒長嫂孫以夫亡絕粒死

又茁陔蘭瑞應花早有精誠通齋指

子詒

皆以先一年之冬感異夢言二親有厄皆於臘祭日密焚疏乞代

詎同孤憤蹈懷沙奇才夙號張曾子故

里重題剡孝家歸向娥江應感慟救親無及祇投瓜

潛寫從容絕命辭孤行壹意不求知

臨命疏云義受待奉倘有諸昆似續宗統已延嗣息歷世名利固非本懷

身後毀譽在所不計得待嚴親地下亦有餘歡惟願老母
靈前從茲無恙滿月湖寸心可鑒神恩不遺哀此愚忱九原自想趨庭

樂兩疏猶傷請代遲竟使阿戎成死孝須憐法護益難爲昌黎已媿非人

類慙說文章是本師

子貽於余詩文
皆手鈔成誦

贈胡匡伯卽送其下第還越二首

結交貴真意取益先知方識君始癸亥散聚亦不常庚午秋賦時我久辭
名場二親已不逮決計爲舍藏君強挽之出深言傾肺腸一舉幸同捷蘭
臭彌相臧我意豈重輕君情胡可忘自是試南省五上公車章我嬾輒欲
止君亟促辦裝綢繆定樓止瑣屑籌餼糧入或代負擔出則眠連牀期勉
勝骨肉衰老資扶助我性褊且急出語類木強尤於執友間齟齬若不遑
君乃更卑遜事我如兄行金石喻此心相得覺益彰希彼古賢迹用爲吾

道光

今年我登第遲暮良自悲君年少余九又復失意歸科名君自有不須陳
慰辭得失何足較所惜在別離我留非得已君歸殊足怡椿萱尙未老諸
子成長時大者已采芹聚婦茁孫枝其次皆入塾梨栗相娛嬉田墅連郡
縣僮指供奔馳養親富暇日讀書溢餘資靈越好山水春秋尤蔚奇看花
或撰杖入林爭褰衣載酒徧僧寺學釣分漁磯此歸秋風始猶及荷花期
鏡湖數十里扁舟相逶迤轉瞬采菱芡黃菊開滿籬遠近楓柏紅簾垂隨
所之烟霞恣揮霍興到輒賦詩此樂胡可量豈若金門羈願君養以福天
倫葆所希以視槐與棘霄埃非等夷

書家書後示季弟五十韻

一昨得家書覽之頰屢蹙羸膺念予季衰替憫邦族諸妹日貧辛阿宜長
錄錄西郭一廛地漸恐不我穀情臨半閑子屠酤雜蠶俗我歸尙無期田

宅本難復感此彌鬱煩寤寐如轉轂姑效瀕人笑勉策跛者足聊以寫夙

懷用爲來者告我家本面城有明始考卜其地尤弗良兵燹遂蕩覆顧念

先人遺爲墟實心惠常願宮以牆於此置宗塾半以藝果蔬半以萃教讀

橫河直河間水香舊書屋梅谿弦誦地名氏遞廢續其前有小池通港爲

屈曲先當構影堂環之一泓綠置樓以藏書沿池種修竹南爲天香居南

祖所題目本生王父居直河在橫河之南故借川趙郡李氏南祖語盆中桂絕奇其趾僅容轂高出重

檐顛廣布一庭馥屢顧諸孫言此樹世所獨闌檻旣幽深几席絕塵黷重

擬建三楹補種幾金粟絳跗閣在東丹雘亦連屬大母持梵誦經簾傍花

蟲下植紅辛夷其香比薝蔔一馨裊篆烟微風裊珠玉仍當遠舊觀懷清

姪高躅先趾旣克存人才庶漸育然後營城中以處親五服東西諸房宅

稍返近所歸毋使他姓滋冀輯兄弟睦余家四郭外大宅三第一房與第
五房世守之太高祖母晚年徙居

城中遂分建大宅上下兩岸凡七宅而族祖其地以公亦開第上岸今郭外皆爲舊土第五房子姓已無幾人常欲買其地以直河之宅基雖今尙全
爲寔思之所以塾課閭閻子弟橫河兩宅及南一小宅悉種蔬果稍治樓廊
直姓最車一宅頗華好徐氏亦割買其中疑悉返之以四宅處
直河子姓以東宅之中命僧慧居之此願未知何日遂也 此事幸俱遂

始自謀適軸湖塘西跨橋山水極麗園籬取苟完樓室不厭複以此爲

菟裘繞舍課黍菽再於南岸山大爲首邱築遠瞻滴渚峯近眺項里麓

考此郭潤渚金般舉先考妣郭項里錢家山皆去湖塘十里遠近間關壤相陰陽嚮南就高煥三世合諸親

塋位辨昭穆一一具碑志表碣隨所目夾行樹松楸間以楓櫟檉環兆待

弟妹先葬仲與叔余亦結生壙自比王官谷前植桂與梅芳艸帶綠縛其

左置丙舍開門見朝旭千秋與萬歲佳城聚骨肉此願果畢完死休真大

福

輓史寶卿二首

別爾甫經月驚傳到訃音美材偏不壽造物果何心猶幸南歸速多應道
喝侵藐焉兩孤幼成長竟誰任

庚午同鄉舉稽陰共九人論年皆弟畜惟子最情親退讓行如畏沈潛學

獨真相知言痛絕追理一沾巾

今春君入都時余病甚皆以不獲隨試君
默然曰此事誠不足重輕然君不得第則君

天下學者心皆不平
每理斯言爲之腹痛

庚辰七月二十四日爲亡仲弟五十生日以雞黍奠之感賦

虛期尊酒對茆堂

見庚午仲弟
四十年詩第

三載泉塗隔渺茫雨夜對牀空有約天邊

斷雁不成行東西各半眞奢願魂魄相依儻異鄉贏得白頭兄一慟更無

兒女奠椒漿

相見

相見無端別亦奇碧城風月總迷離虛聞青鳥傳佳訊未有瓊華答好辭

燭影忽開金鎖入漏聲偏恨玉窗遲香濃花亞春三刻白了劉郎幾鬢絲
八月朔日偕潘孺初袁爽秋兩戶部鄧鐵香洪右臣陳雲舫三御史
史許仙坪樊雲門兩翰林集天寧寺餞鄧獻之還黃岡
祖帳西郊集餘炎翳寺林憂時須縱酒傷老重分襟室淨香能定山秋翠
漸深闌人隋塔在千載幾登臨

日暮復同至南潏偕仙坪鐵香汎舟用落日放船好爲起語
落日放船好一泓秋可尋渺然如世外清絕見吾心藻影浮空動荷香入
定深艣搖魚躍際都是故鄉音

後一日再偕雲門及敦夫汝翼弢夫集寺之塔射山房餞敦叔
隔日期茲寺長緣餞客來秋陰殊昔望山色向人開遠樹收高樹疏花出
講臺當筵眉黛落相映手中杯

酒散欲同泛釣魚臺下不果歸坐庭樹根看夕陽作

看山意未已欲往泛漣漪人事輒多阻夕陽偏與期歸來坐林下正及晚晴時一角明霞麗多情映柳絲

送王平子樞歸里

廿載荒郊殯南歸始及期妻孥貧益甚烽火幸無知黑海魂多恐青山葬

有時尙憑文字力宿諾媿稽遲

此事發秋伊之力爲多且謀爲之辨與平子實未相識也

病中雲門及朱桂卿同年

相說見過

臥牀肌體不關身帶孔移來祇隔旬豈有精神辭李廣頗傳恍惚過劉臻
時艱曲突焦頭日天幸支離攘臂人官府正求醫國手橫流何術濟斯民
秋陰借敦夫雲門汎舟釣魚臺下循隄至行宮而回

西便門西池水邛邛中往往多泉源裕陵親敕疏湖道上承玉河環郭門

湖岸周圍二三里中種芙渠雜葳薜烟波遠過積水潭澤物如何十剎海
我來已及秋之中朱華落盡田田空枯茄十萬颭風際偶見一二搖殘紅
湖船六柱就花泊萬疊西山挂篷角惜哉不早三旬來四面香風臥花幄
我生會稽烟水家鏡湖花國古所誇湖盡爲田花在岸絕無畫牘能穿花
回舟更傍御隄去寂寂行宮鎖烟樹紅橋映帶清泉流盡是先皇豫游處
金源遺事莫徘徊伯業名流等作埃卽今瀟碧澄漪地幾見西巡翠輦來

行宮中有滿
碧軒澄漪亭

三里河道中二首

青林紅秫裏時見野人家一水曲相繞沿隄蕎麥花
羣鳧白於雪湖臥綠莎靜水碧與莎連磯下見鳧影

送羊敦叔比部改官吳中郡丞二首

薊門風雨及中秋仙眷輕裝下桂舟捧檄自欣迎養便改官終較左遷優
曹司十載同囊處仕宦三吳亦錦游誰道鰲鱣歸意決近來江海欲橫流
文字論交近十年帝城花月每招延才華合爲中朝惜離別重添暮景憐
秋色津沽開海嶼遠山松桂入吳天五湖何日相追逐眉黛清娛畫裏船
有感

一聞雷驚走鰲鱣屢誤甘泉報舉烽幾輩闕前誇驚擊有人橋上戲龍鐘
狴牢已見歸良嗣狗國何曾敬郭鋒一檄指揮諸將讐不堪此手祇攜笏
次日用前韻寄竹簣雲門

赫蹏海上迅追鋒瞬息戎機達九重東去鐵營連黑水西來玉節入甘松
輸情詎有中行說約誓長依贊普鍾與子且爲山澤侶短衣射虎一相從
九月初三夜集飲韓家潭朱霞精舍以露似珍珠月似弓爲韻余得

露字

晚秋煦餘暘嘉辰惜遙暮微行遶城南朱樓臨近路清池不可見屢寫自
來去孤棕暫爲歡卽眷儵成故華月呈纖鈎娟娟隔疏樹芳筵啓軒幃銀
燭映階露衣薰扇際分鬢影尊前度素心偶合并紅顏豈長駐留連壺箭
添惆悵雞聲曙

又代人作得似字

煜煜桂樹華粲粲菊叢藥桂生詎云潔菊開亦易委所託雲露滋承藉始
爲美自惟莛質輕蓬心本無似日夕望碧雲開徑遲玉趾幸陪言笑歡良
宵繼清暑珍果自求甘芳醕自慙旨初月鑒薄幃清風落橫几願爲筵上
燭明心奉君子不作衣上香因風辭玉體

庚辰重九作

年年衰病罷登高
酹相呼就菊螯木葉西驅安息馬
霜花北淬赫連刀
時伊州將軍金順馬疏至伊州古烏孫國地四
與大宛安息鄰湖南提督鮑超羣勇抵天津排裝生無濟勝摩雙足老值
時艱感二毛秉燭且爲長夜飲
不須酒伴覓詩豪

書北周書宇文護傳後十四韻

閒尋薩保周書傳
懷絕閨姬寄子辭
隔未九泉終可見
貴窮五等欲何施
三年備極人間養
八袞重看膝下兒
雨露十州傳肆赦
貂蟬百辟祝期頤
至尊下講家人禮
母后頻修叔姒儀
未見東朝謀玉璫
已營高冢隱金椎
追惟轉側他鄉苦
幸保從容晚節慈
差免掃墳嚴媼歎
不同乞命董親癡
論功詎可姬文匹
逼主常遭子孟疑
自惜負芒由寡學
竟令煮餅取殲夷
千秋留得斯文在
三復能生孝子思
須識皋魚披褐日
莫如溫嶠絕裾時
倚閭無望嗟何及
列鼎雖豐事益悲
爲語南朝顧歡輩
不應偏廢蓼莪詩

十月十五夜步月籬下作

初冬茲夕望氣煖秋中旬皓月耀澄魄玉照無纖塵嘯侶絕芳躅瑤衷孤
莫因幸有一弓地俯仰寬如春疏楊綴餘葉瘦竹浮寒筠清影在庭下因
風動微淪階露久侵韞籬枝時礙巾寥賞誤能遠靜取景彌真不知冰霜
迫惟覺天地親當其獨往時蕭然山水鄰彈琴無與會松桂思遙人

十月十六夜偕敦夫對飲朱霞精舍看月

今夕亦復佳心賞隨目涉清輝固不減瑤襟互成愜銀燭啓蘭幌紅窗掩
瓊葉激盪金尊開迤邐晶屏疊瓶花映鏡重鑪薰展袖裊靜數銀壺箭暗
聽繡廊屨茶香遞密語酒霞泛紅醫綺懷豈取盈歡棕暫爲接歸逢人早
朝籠燈指遙堞

十月十八夜招鄧鐵香許竹簣及敦夫雲門飲寓齋送朱桂卿庶常

編沈子培比部曾植兩同年還秀州

久客傷歲暮拙官思冬閒言遲素心侶共此尊俎間南窗納晴日殘菊橫
酒船翠袖互捧觴紅鱸近當筵清談未知倦素月生櫓前坐中朱與沈得
第歸故山聚散亦偶爾衰老彌可憐廿年不得調一第窮依然湖鏡待霜
曉巖花候冬妍猿鶴怨亦久白頭未知還安得一畝地結屋依流泉相招
就菰韭曝背終餘年

詠史二首

捧日黃雲宴慶成無端一疏落華纓差同兒女嗤臨汝羞見獼猴舞列卿
故紙餐筵猶有獄鐵檠橫膝太無名烏噉吹笛偏同坐舉酒吳宮想顧生
羈劉五柞設和門神策由來七校尊虛說霍光搜挾刃竟聞胡建劾穿垣
南軍日造黃龍艦東府親持白虎旂講武驪山原故事銀刀組甲久承恩

同鄉陳畫卿觀察錦自濟南寄書告其子諸生昌沂夫婦之喪以所

作烏啼曲見眎并和余感遇詩六絕句酬以長句二首唁窮慰老

情見乎辭

驥子才名正軼塵忽聞中道喪嘉賓麻衣化蝶隨佳婦吳夫絕粒亡繡服

垂魚對老親畫卿太夫人年九十尚在堂作宦難求千樹稅著書還惜百年身最憐羸

博哀號後手疊詩筒寄故人

成佛生天等是遲名場桑海不堪思來書言道光中國郡之士角逐已無

朝士貞元輩幾見文章正始時投杖西河新止淚看花東野尙稱詩風流

依樣陳驚坐同爲龍鍾一撚髭湖北羅田人陳雲舫員外與君同姓名亦賦余得第詩爲題

陳雲舫員外錦賦二詩見贈奉酬一首雲舫寓南寺中

覓句陳無已禪關出每稀貌如僧入定官與世多違佛火分綿案龍花點

織衣難忘三島事欲挽李靈飛

君以癸卯不賓館林還故爲憤利故戲及詩以

越縵堂詩續集第六卷

南運鴻 雄翰飛校

越縵堂詩續集第七卷

清會稽李慈銘愛伯譔

姚安由雲龍變舉編

許竹筠以侍講賜二品服爲奉使日本大臣索詩爲別作長歌一章

送之

聖清懷遠頓八紘大瀛海內皆王程皇華之選極侍從特賜金紫銜東征
日本名見自唐始隋稱日出處天子夜郎笑漢夷俗然黠鼠誇讎匪所恥
我聞倭北接馬韓蠻觸百餘山島間通譯漢魏三十國至今滅沒同飛烟
吾妻鏡事略可錄天王系院代相續文物差欲躋新羅衣冠漸亦效華俗
狡爲邊患始有明鯨魚跋浪吳會驚朝鮮濟師幸告捷舟山乞援終無成
方今外憂日孔棘犄角大秦連漠北東眈西睽相翕張呿呿蛟龍視弱食
中山歎斯千葉王一朝驅縛如老羊鐵艘出沒鼉鼉嶼蜃涎錫錫擬菟浪

冲聖垂衣米親吏兩宮宵旰軫邊事中樞持重疆臣媮緩急弛張屬之使
君在翰林稱敢言搏桑指畫几案前龍節拜奉璽書出東風吹旆爭花先
津沽春水竹箭迅妙簡賓游盡才俊古云隔海萬二千破浪鷗輪抵一瞬
對馬隱隱神山開卷帆直過邪摩臺男冠四花女屈紛鼓角齊迂天人來
自來折衝在尊俎松塵一揮落芒距從容餘事及藝文先唐佚書尙堪補
送君驂驪雲尙飛薊門柳色未侵衣三年會看鯁人貢百輩朝衡隨弭歸

三月十五夜月下看李花作

王母迓瑤島侍女驂素鸞猶留一輪月下照人間寒九春此終望皎臨天
宇寬清輝極淑景徧覆千花妍中庭一株李瓊英耀簾前皎潔互映發風
露交銀瀾芳華凝良夜拂拭當盛年濯以圓靈鏡矜彼婉孌顏恍移玉樹
至壁帶琉璃懸方今識白柰縞族羣仙鬢長樂耿孤照元霜失還丹逝景

不可駐星斗漸已闌惆悵階下雪何厭終宵看

三月十七日雨後嫩晴柳絲舒翠迎春競花丁香亦有新綠掩映夕陽中非畫所能到也以二十八字寫之

不須風露倩邊鸞金碧春深咫尺間記取小窗寒幔際夕陽一角李家山霞芬饋木香花

細翦冰靡屑麝胎雙含風露落瓊瑰分明洗硯勻牋側長見籠香翠袖來夕陽時看半開海棠傍晚看李花欲落各媿以一絕

豔倚斜陽不自持殢人紅萼最相思漢宮恒滿燈千樹曾照陳嬌未嫁時綈衣獨立更傷神日暮能傳倩影真幽恨臨風如欲絕楚宮萍泊息夫人暮春偕鏡予至極樂寺看海棠是日霞芬攜其婦治具於此賦詩二

首

鈿車相約鳳城西千樹猩棠映玉溪塔影遠從田水落山光不礙寺牆低
似聞曲徑通鶯語早有游蜂趁馬蹄花雨一鐘齋杵動午香吹到碧玻璃
花外行廚花裏人低枝時見罌紅巾落英豔點弓韞窄纖朵嬌侵鈿額新
池上衣香經月醉酒邊鬢影一家春多情不奈東風劣長爲羅襪碾麝塵
雨後晚霞看桃花

積旱望雨殷花時憂雨至三日雨得晴未損晚桃麗西見紅霞明遠落小
窗外窗外一樹桃恰接晚天綺隔以垂柳陰新綠出紅際甘雨雖滿缶瓶
粟不我繼保此晚晴花欣然自天地

後二日夕陽中看桃花半落

時雨旣得晴斐回數花樹晚桃開亦久紅芳夏猶駐漸見落英飛時與游
蜂遇緩步惜蒼苔曳杖延日暮夕陽在花半一角屋山露淡淡茶烟縈微

微柳風度睠此傾城姝無言墜輕素豔絕不可留長記經行處

立夏前一日紫藤花盛開輕陰微雨坐花下作

十年賃此舍隙地皆種花辛勤幾心力償以三春華花樹幸長成白髮彌
自嗟西軒一朱藤拂拭尤倍加垂蔭幾盈畝夭矯爭龍蛇縛架出檐外歲
幾天半霞纍纍萬紫瓊因風被瓔珞吹香及初夏擢鮮殿春葩輕陰照橫
几碎英點烹茶扶持紫雲立不隨柳枝斜清絕日宴坐林幄如山家何當
圍朱闌映以碧窗紗

花側一小舍久廢不居今夏擬稍修
莊之設矮閣小窗几榻爲結夏之地

立夏日澹晴間陰竟晝坐藤花下

茲辰入晴夏清和不改昔縣花罽曦景細葉鏤烟隙及此盛時花安我暇
時席粉沾衣袂香綠映壺甌碧睠彼清風來微覺晴暉隔梅街相公家

梁文

莊公第在楊梅竹斜街清動堂前有
藤花甚盛乾隆後爲旅舍花今尚在波寺詩老宅

朱竹垞寓溧波寺街有
古藤一時題詠甚多

事皆晉浙文獻至吳興戴顒大常孫陰維記言宣武門街咸以斯花名

觴詠萃裘屨勝事豈有常傳舍屢遷易此坊盛文獻王翁最耆碩王滿門

有老樗山陸冰修梁仲泉翁有詩境軒今皆不知其處佳植偶見遺風流

遂浙敦我今此宴譽聊寄一朝適無石堪橫琴無僮可共奕擁書獨危坐

時聞英墜幘猶恐風雨至彌覺芳陰惜晚晏斜陽明槃娑碧雲夕不聞鳥

雀喧那有客行迹

欹枕

紗窗小拓翠深深一院無人盡綠陰欹枕不聞朝事到勝他巢許臥山林

漫興三首

漫與心情懶自醫不能絲竹不知基點朱數紙日平過午手引垂楊弄雪

狸

老來病濕怕黃梅堆案經書懶更開猶有榴花娛倦眼數枝紅過短籬來
車聲牆外走琅琅涉淖衝泥有底忙樵櫟莫忘公等力三朝高臥作賞郎

哭王眉叔

老來朋舊盡凋殘又報王喬下玉棺銜恤惟君勤問訊讀書無日免飢寒
清才鄉里誰今繼白首名場較我難

君少予一歲嘗自謂五十當得鄉舉而竟不驗

有女傳詩兒

識字此心泉下定差安

六月初一夜飲花下作

冰幙文簾自生涼小啓銅鋪作醉鄉恰避明窗來素月倍憐密坐勝紅妝
扇低酒併衣薰發燭轉花添鬢影長爲話唐宮今夕事玉環一曲荔枝香
後三夕再飲花下遇雨遂至曉卽事十韻

朏月遲呈輝曩襟喜暫聚道盡苦鬱攸卜夕選尊俎幽坊引轡轅華鐙展

綺戶睡燕識屢聲畫屏故延佇隱隱花上星晶簾照人語玉映蕉衫鮮霞
張錦簾黼醺藉河朔飲旖旎濯枝雨冰肌沁飮梨明眸溢斟醕靜添銀漏
水已動曙街鼓貽我紅梔花懷香入風塵

小暑聞蟬

玉衡指在未城居始聞蟬質此半畝地綠陰亦便娟翩然不我棄冠綬來
周旋肯惜數聲嘽爲我清心顏徑燕絕車馬家貧無管絃午風作幽弄頓
覺煩熱蠲祇恐輕翼駛頃刻鄰喬遷須知此中樹所灌皆清泉下有曳杖
翁自闢山林天濫來伴嘯詠月照虛堂眠

六月十五日酷暑中思故鄉村居用朱子是日詣水公菴雨作詩韻
病夫苦煩暑陋室厭朱明爲念江南邨樹樹涼蟬鳴扁舟一出郭便覺湖
風生山翠疑雨潑田水如泉傾臨流數柴扉倒影有餘清繞籬桑竹靜連

棚瓜豆榮日午飯牛畢偃臥無它營安得一頃地解官事歸耕

夢孫子九

老去孫陽臥草萊齋鹽白髮苦相催忘年交舊惟君在久別音容有夢來
門巷平生猶髣髴湖山夜色幾徘徊何時里社同扶杖百歲相看兩秀才
觀蓮節侵曉至十刹海看荷花入地安門書所見

晨赴尙書期遂沿北湖去冉冉紅蕖香濯沐帶清露花間數畦稻新翠如
欲雨荷蓋相倚移花光不能住長隄輾芳塵夾岸蔭高樹朱扉猶半掩略
約無人渡誰何繡轡車斑駁臨大路高髻曳輕容明眸爲花妒漸見朝旭
升驚起傍沙鷺循湖入苑牆遙指五雲處朱輪早朝歸無心與之遇

七月十三日立秋雨出西便門失道徧行玉河鄉野田中循土山
出至釣魚臺湖邊看荷花欲登舟以積水不果小憩行宮外垣遂

至天甯寺三首

昨夜梧葉動曉起策輕騎言經鳳城西密雨兼秋至斜行入畦間青蔥但
一氣高粱如人立麋黍亦垂穗時時見人家葦籬出深翠暫或煙雲開西
山露偏髻不因岐路迷安知塵外事得賞非素期涉趣由靜致隔隴聞鐘
聲緣之叩僧寺

迂行七八里陂陀見土山昔當乾隆盛大疏玉河泉積之爲自昌歲久成
林巒嶂開全湖見芰芡與蓮朱華裊雨肥綠蓋迎風鮮閒露白菡萏亭
亭含孤妍湖光合山色上下一碧連時見白鷺飛點破蒼波煙惜無吳娃
手蕩此六柱船紅蓼爲我醉醉卽花中眠

離宮俯河邊牆雉相次坐中容數晦地略具堂與室喬樹欹綠陰危磴學
崇密葦欲清池平蘚隨板橋接碧臺映微流猶能照丹漆園丁爲我言穆

皇昔駐蹕簾懸尙望幸鑪香已久闕裴回翠華影日午啼鳥未出門向東
行沿隄繡明瑟林霏沍炊煙下有人行迹一塔銜馬前童童出雲碧遙點
松際旛招我入香積

天甯寺殿廡西偏一室極淨窗開山滿甚愛之用章左司行寬禪師
院詩韻題壁

花陰轉深廊西窗俯叢竹几席皆山光清輝媚幽獨靜聞林外香安得經
時宿

謝鄭僊尙書惠龍井茶用山谷謝李右丞送碾賜壑源揀茶詩韻

天目呼龍種蒼壁瑤艸滿山獨能識盡吸黛綠含泉光文君遠蛾秀可食
十年羈紲黃塵間漱嘗苦井誠愁顏密雲夢不到官局粗梗濃薰出隔宿
頗如濁蠟浮紅醅亦疑蠟膏泛樺燭公今文饒善別水我媿季疵略涇渭

每聞鬪鋸頭網來親封綠囊持送似越甌翠色剪新湯攢驅睡魔疏菜腸
松谿竹樹髣在面化成碧唾猶生香伐性除煩兩何有有毀我者飲以酒

得子縝辰永道中書并辰州雜詩卻寄

行盡瀘谿灘水間高秋旌旆照江關漢家銅柱窮三楚

此五代馬氏所立

使者瓊

琚振百蠻花桶肯輸鈴下贊蘆笙迎吹馬頭山白羊妙絕觀刀曲

君有水順營中

觀苗王刀度清初調極工早繡弓衣付犴囊

閨秋飲集嵩雲艸堂池北精舍河南士大夫新築宴賞處也

勝地招邀萃羽觴麗樓闌檻帶虛堂清池水影先浮澄高柳秋聲欲滿廊
雲物略存嵩少意鐘魚猶接梵蘿香雙藤宰相風流歇尚有寒松翠過牆

堂本接待寺地對門為松筠菴康熙中高念東侍郎寓此菴獨登都相國過之高賦詩有戶倚雙藤梵宇間無人知是相公來之句

閏七月二十五日早起秋晴口占兩絕句

北牖晚桃含宿露南簷高柳見朝陽瓜藤豆蔓更番絕猶有風情到海棠
一叢瘦竹筍猶茁幾樹晚榴花尙新更向僧寮買山桂鄰人不道此官貧

晚霞

手弄垂楊線回頭見晚霞殷勤如有意紅不到鄰家

寄趙桐孫同年以郡守攝易州牧

喜聞旌旆出燕山倒馬飛狐按部還太守下行唐刺史神京西扼宋金關

六陵佳氣趨朝側

秦陵漢陵東陵西陵皆在州境

兩易清流判牘聞自古隄臺

憑弔地可憐千載夕陽閒

寄程雨亭攝守楊州

縣盛淮南第一城擁麾五馬是專征蠶鹽利害空殫策爲政風流豈在名
翠柳萬行圍燕坐紅樓十里入秋晴須知吏靜閭閻樂只聽吹簫月夜聲

寄朱肯夫學士入蜀按試建昌道諸州郡

近臣持節出蓬萊又見瀟湘鐵網開五月槐花臨首驛雙江竹箭導離羣
山連越嶺銅關壯地入天彭玉壘迴定爲朝廷求宰相莫因作賦薦雄才
寄敦叔吳門時以試丞都知巡街

判襮金門一載餘又催歸信到蓴鱸潛郎白髮長三署試吏丹旌近五湖

燈燭籠街牙隊出笙歌罷月畫船孤

時虎阜山塘燈船久禁

料知聽事亭聯暇爨影

山光足自娛

君以侍姬自隨

雜占四絕句

朝來桂樹華瓦盆窻几開不知會稽山紛紛幾開落
經年不入署吏告陪郊壇爲問京師大何處借朝冠
北地多佳果柰梨秋畢登如何夜來夢只食鏡湖菱

晚從西鄰歸米盡炊還待笑看秋樹頭尙有斜陽在

門前看晚霞至保安寺與友人遇褻回而散

向晚人迹絕閒庭遲暝意忽見鄰樹間紅霞一何綺出門相追尋行吟入
蕭寺漸覺庭院明山色亦來至茲景本偶值心閒應以會旋與素心遇各
道山居事澄鮮秋水上相映彌成麗不見莫禽還竚立鐘聲際

雜興三絕句

幾日樵蘇漸斷青炊烟長覺晚來停西風大欲將人事落葉蕭蕭夜滿庭
郎吏追鋒日騁車自慚朝謁十年疏三間老屋風簾下金粟堆頭照點書
柳外寒蟬早罷鳴豆籬悉蟹有誰廢獨憐絡緯瓜藤裏猶占斜陽一兩聲
酬王益吾祭酒見贈之作竝問其太夫人起居

內翰春風領誦弦辟雍清秩拜餐錢西京獨擅三劉業東觀新裁十帝篇

君讀漢書補注又編國初天命以來十朝讀東華錄俱已成案東市過槐

花猶夏課秋高萱樹自長年應知師氏循陔樂多少何蕃乞養旋

益吾祭酒和詩見酬述其比年昆季子姪零落之感太夫人望孫之

切情詞肫摯殆不自勝再賦詩二首冀廣其意兼道所懷

琳琅入手白華詞采服春暉六學師將見黃麻宣錦誥新栽紅荔茁瓊枝

君新納一姬

天倫自古誰無缺色養如君樂可知爲語皋魚銜索苦一生集蓼

不堪思

卅歲喬傾仰母賢讀書踈厲氣無前詎知髮白登科日已過星終泣血年

顏駟三朝仍不調商瞿一卷望誰傳所期投老茆堂下長倚青山好墓田

辛巳重九日偕敦夫汝翼兩編修游城南諸寺登龍樹寺看山樓晚

飲酒家歸

芒屨莫負菊畦香踏徧城南選佛場白肖蘆花通野徑紅隨楓樹倚斜陽
登樓自盡雲山美過雁遙知驛路長客裏猶憐陳鮑睦相邀一醉是他鄉

九月十三夜飲霞芬家賞菊是日煖甚月如春晝

爲典朝衣漉葛巾未霜天氣撰蕭辰深秋明月溫於酒綺閣黃花豔似人
小隔晶屏尤入畫儻橫蟬鬢倍宜春江湖十載差無負更放華燈照錦茵
辛巳十二月三日赴署過京察歸書感

游戲紅塵又一回昆明難認却前灰并無長柄胡盧問常見春風燕麥開
夾筆空誇雙足力溯河誰記一錢才自慚蕭育真男子下下虛經九考來
前夕夢歸越中負郭有山蒼翠矗立屋隨山爲高下其外大湖煙水

萬頃遠見青山如髮醒而記之

繞郭湖光萬頃煙樓臺都似鏡中懸分明一髮青山外着我孤舟暮雨邊

鄉人楊雲堯布衣

作集

自吳門致書道懷卻寄兼謝其佳茶筆墨之

餽

山條水葉罷耕耘塵外蕭然愛古薰冰雪自聯詩眷屬

雲堯爲沈
曉湖妹婿

風泉閒

助佛聲聞

雲堯
耳聾

埋名橋下舉通廡託興城頭鄧尉雲清絕點茶研墨事每

拈斑管輒思君

送張孝達閣學巡撫山西

主恩持節蒞嚴關暫輟承明鳳閣班春動旌旗恆嶽驛花迎鼓角晉祠山
北都雄鎮青天上內翰清名白水間榮遇儒臣推第一待看經術起時艱
十二月十二夜月皎甚偕敦夫近步歸保安寺街二首

歸踏滿街月閒門星斗斜大聲聞隔巷樹影似山家地僻猶餘雪霜嚴早
噤鴉漸聽更柝繁始覺住京華

王邵論詩地

邵子湖青門旅稿自序言已未歲寓保安寺街與阮亭先生隔僅一牆

風流已渺然履綦思薛

迹門卷幾茶烟郎署清吟暇

阮亭部郎時亦爲月部郎中

康熙極盛年料如今夜月梧影

落華箋

越縵堂詩續集第七卷

南道馮 雄翰飛校

越縵堂詩續集第八卷

清會稽李慈銘愛伯譔

姚安由雲龍夔舉編

正月二日覽鏡見顙須添白十餘莖感賦

老來覽鏡輒經月忽覺吳鹽新滿颯獨爲冰霜先變色須知天地本無私
人生見此猶爲幸世事方殷惜我衰何物春風偏不到祇應爾與鬢邊絲

後雞鳴歌有序

咸豐辛酉之冬曾作鷄鳴歌悲時在位見幾之不早也今復爲是
歌故題曰後時光緒壬午春正月也

君不見眉州相公最恭慎密緘自署臣安進異代同姓誰最賢涎想堂餐
摸堂印廿年尹京鑄橫去財馴長六官斟斗魁耐彈差不及劉吉蹴躡道
上瞻三台又不見深源虛負俗流譽生意婆娑比枯樹盲人瞎馬夜半行

咄咄經年不能去時過那有風雲來尙戀芻豆羣鴛鴦學生已媿太倉鼠
鐘鳴漏盡胡爲哉黃頷少年氣何盛對仗彈文讀之竟采藿虛驚猛虎來
掃擇奚煩疾風勁嗚呼七十致仕偁懸車進退以禮綽有餘朝廷大臣養
廉恥奚待新進來毆除罷官屢問蒙正泣誰似敏中偁耐職悠悠坐令時
主輕伏牀熨衣亦何及膈膈膊膊將五更何不高臥聽雞鳴

吁嗟行

吁嗟高昌巧言高安倭千里之草風不競誰何健者出里儒寒氈雪映甘
棠湖讀書所得媚世術母乃姓名羞江都國運中艱餉需急百萬轉軍竭
膏血誰知仰屋廿載餘自爲司農作金穴和我大邸開海西侏離上坐斑
闌衣王公咕囁獨迎笑俛眉進酌金留犁赫赫潮溝董世子織襖打稽五
都市爰書數尺名捕亡日入西曹夜北里忽聞告密緹囊投魯公罪狀出

蔡攸都坐嚮胎卻不理眼看鄰上生戈矛可憐瓜葛尙如此龍鋪夜行不知止七八十翁何所求爲汝檣杌作馬牛詔書先奪貉隸職繼罷文昌聽嚴劾徒令年少相誇張書生大破銅山賊

席姬生日戲作俳體示之

汝生在癸亥我已爲賞郎及今二十稔額外猶潛藏自汝入我門積歲亦閱五兩次徵夢蘭所任皆不舉我日在西崦汝年方嫁時我謝孔明德汝擅黃家姿勉循游房日庶幾上宴辭今年歲在壬仲春日初九爲汝設悅辰門垂嫩黃柳灼灼山桃花來映玉缸酒陳吳及朱鮑交契四翰林嶺南鄧御史我亦僑同心今日適俱來同喫玉塵飯或者充閭喜以此慰如願中婦倍汝年其生端四日明年季秋中大婦開七秩待汝歲周甲女君百歲齊我亦九十四齡背看雞皮

攝病十餘日不出矣連日輕陰花朝前有小雨賦詩簡同志

愛閒耽微疾塵市常閉門瑤琴久不理素書亦偶溫賃人一晦宮朝夕視
花樹山桃開已殘絲柳長堪度朝見李藥白夕看杏萼紅輕陰兩番雨已
過花朝風故山不能歸春事候已老白髮惜流光常恐花開早何時值尊
酒曳杖撰嘉辰婆娑好花下怡然天地春

折庭中花致敦夫媵以一絕

一枝金雀一枝桃更有丁香紫上梢客思春陰無遣處送君聊與度花朝

傷貓

雪獮愛參五年餘桃簡呼名伴索居

貓耳有旋斑如小桃因以名之戲用佛經黃眉貓事

夜臥莞筵

時警鼠日馴几案亦窺書可憐垂死猶依主尙冀重來喚飼魚荷鍾便埋
庭竹下明年長筍傍階除

仲春二十九日偕鄧鐵香嚴鹿谿袁爽秋看花至慈仁寺觀近人所
撫九蓮菩薩畫像晚入長椿寺觀明孝純劉太后續象爲長歌紀
之

長安二月多好花鳳城日日走鉤車疲羸亦結下澤隊尋春輒入空王家
城西多結勝朝寺半出慈甯內宮賜鐘簾分鐫阿監名經函細鑿畏吾字
慈仁敕住周吉祥茂陵布金爲渭陽修羅內出百軸畫毘盧高閣凌風翔
至今金碧盡銷蝕補種雙松亦無色猶有隙地供栽花廟市不開作香國
禪房小炷旃檀烟低眉繪象天人妍不跨慈壽九頭鳳魚籃來結楊枝緣
阜成門外八里莊慈壽寺有一幅付慈仁寺身被纏絡紅蓮花然諸僧訪
研植兄弟訪得重裝別處一幅付慈仁寺身被纏絡紅蓮花然諸僧訪
旨慈壽寺有煉像菩薩九首金鳳傳是孝定李太后夢中所見菩薩
經者未嘗言有畫像亦不即指跨鳳爲李后也慈仁寺有無幾觀音亦李
教后所奉夕陽漸上娑羅樹驅車更踏槐街路長椿佛勝猶施霞慈聖當年賜

衣處水齋不作齋庫空滲金寶塔鈴語風青蓮九朵亦塵化猶有一軸囊

緘紅萬佛袈裟紅錦紐傳是思陵孝純后此用公成風文例智上已無菩薩題毘

盧猶認辟支首當年私祭娘娘墳遺恨千秋堯母門差勝沈瀟空遣使遠

慚韋后見僭尊遺像淒涼求不得畫裏春暉渺難卽月額頻煩指懿妃金

容彷彿傳瀛國可憐靡仗列千官迎導旛幢跪問安不見珠衣御長樂并

無翬翟納金棺至尊哀慟撫靈御六宮雨泣陳尊樹入夢猶言解菜來隊

泉終見牽裾去弔古蒼茫起莫烟丹青俗語定虛傳武清新樂各家世莫

使文殊誤普賢長椿寺藏有戴竹坡稿紅綾製女像一軸是莊烈帝母孝純太后朱竹坡稿

一牌書九蓮菩薩初意有圻所重舊聞考已云不存今劉后像乾隆中及

戴祿庚辰陰曆記字俱無之寺僧述誤指爲九蓮菩薩像蔣氏忠雅堂詩集

曰軸九蓮方丈室無辨之稱

壬午都下清明絕句

叢祠南陌綵旛斜上塚人來駐鈿車女伴指言春已晚貨郎擔上碧桃花
壬午三月三日借周荇農閣學徐壽蘅侍郎王益吾祭酒陳汝翼朱

鼎甫兩編修禊飲崇效寺題拙公青松紅杏圖卷後六首

清游重憶十年前破寺楸花四月天今日新修木蘭院僧貧猶乞畫叉錢
祭酒時名賈馬儔翰林才調盡風流彥倫孝穆皆耆舊我亦看花過白頭
芍藥新栽替牡丹棗花無復詠攢攢休教更話金源事塵晝明昌間聖安

寺東北半里許爲聖安寺
舊有金章宗李元妃像

元碣都無況李唐猶傳白紙舊時坊闌黎輿廢關何事今日今年作禊堂

徐星伯云永樂大典引析津志言寺爲唐魏州節度使劉濟捨宅所建而
日下舊聞諸書俱不載僅言元至正時賜額崇效亦不言其始何名今寺
中惟有明碑二言寺廢於貞觀時蓋誤也元明時白紙坊最大
北至善果寺西至天寧寺皆其地今惟此處稱白紙坊而已

巾拂難招雪塢師朱王風調更誰知疊花聖壽俱塵劫祇有斜陽似昔時

後花聖壽寺名在崇教寺旁近乾隆中尚存今述其處

故鄉鏡水若耶邊多少蒨裘士女船可識柳湖車馬影暮衝歸鳥出林烟

聖安寺地名東柳湖郭宋隱堂有宿柳湖僧舍詩卽指聖安寺也蓋昔時此地皆多水故以湖名符老言二十餘年前到此尙有一水通小橋今橋

已圯其斷石猶存

修禊次日符老以六金屬轉界寺僧裝圖卷日落時復過寺再書二

絕句圖尾

好事廬山周續之賣文乞與畫圖資耳鳴卻笑李居士來趁鐘聲補寫詩

纔過穀雨日初長特出南西訪海棠爲愛嚴維誦詩句再來此地看斜陽

是日有揚州人嚴六誦過訪言今晨入寺見圖卷中余昨題詩有祇有斜陽似昔時七字因誦不已因約至花之寺看海棠遂於哺後出右安門獨

游而反右安門俗呼南四門

修禊次日夕陽時出郭獨游花之寺日落復至崇效寺用荇農閣學

訪崇效寺詩韻

雨後沙塍似水平暮春初試袷衣輕人從新綠來穿樹馬帶斜陽又出城
花裏茶烟知客到林邊邨落覺山清閒官似此真忙甚日向僧寮挈榼行

爲周荇老題東坡爲羅浮鄧道士守安臨文與可墨竹真蹟

長公所畫竹鬱如蒼松姿粗榦雜大葉閒亦橫小枝飽喫黎峒飯追寫還

朝詩

畫於元符元年時在備州畫後又書元豐十年

還朝時爲道士王執中題文與可墨竹詩一首守安爾何人得此大

法施平琅玕十餘丈永爲雲笈資羅浮本仙宅光怪照海湄瑤花與琪草

匿采不敢奇至今八百年神物常護持湘中老承旨文采動四夷退食偶

有獲珍若餐瓊糜私幸此得所子孫永寶之我慨今之士儕輩恥相師又

或擅微藝矜祕呈須眉名位稍貴重下士無由窺公乃臨老可又肯道士

貼吐舌出三疊斯語非吾欺對此發三歎今人安可爲

三月十五潘絨庭丈招同嚴六谿法源寺看牡丹絕句六首

看到藤花興已闌
羸膠懶復逐長安
忽然一紙消搖箋
約向禪房餞牡丹
傑閣丁香四照中
綠陰千丈擁琳宮
別開曲徑藏春塢
煖約雕闌一面風
錫杖經壇振法儀
珠旛高傍梵輪飛
離鑪香到雲窗外
千色花光上袈衣

士僧方開
壇傳戒

隨意迴廊曳杖行
經樓百尺俯花晴
朱闌縹緲諸天上
鐘鼓都疑下界聲
鵲隊鐘魚散午齋
幢幢花影靜香臺
十年不赴朝參客
有底忙時飯後來

余到寺時
已過午齋

薜荔牆環一徑深
漸聽鈴語入風林
苔階宋歷斜陽下
閒向山門看竹陰

題舊畫北齋校書圖

有序

圖見山谷題跋傳出唐閻立本南宋剽去其半有范石湖陸放翁

跋韓南澗題詩今藏長沙周開學壽昌家

揮豪挾策坐滿堂或啖酒果據胡牀奚奴立馬待廡下高鬟紅袖侍兩行
鮮卑鄴下何天子殺攏不飛九龍死起本盜賊終滅亡何取羶腥列青史
大犧人螭所不如獨親儒雅知重書先啓祕府校墜籍終開文林羅羣儒
孝謙建議桴遺闕一十一人各勤職入室應招許散愁負笈還尋馬敬德
青綾御食漢臺郎女史親添五夜香滿袖花釵傳請客隔窗宮燭照披裳
唐宋相沿僻故事馬子三臺亦堪記入盤曾黜邪蒿名作讖悲聞正道字
嗚呼文宣甚暴何諡文講經就傳彌慙慙濟南實得漢家質惜哉不得長
爲君宋人事金謂金父紙上前朝慨呼虜

圖後范國諸公跋皆斥爲廢公

穢史虛標勃海

宗當時自習鮮卑語藁燃蠟破徒恩恩鷹封郡君狗儀同獨仗一事重儒

力得與周魏併齊蹤絹素流傳特健藥對榻俄空半已割

山谷版有對絹
七人石湖版有

已逸去
其中

長幅猶題南澗詩真蹟難求涪叟跋爭言粉本闔文貞右相丹青

聊戲評人生擇術自當慎伏池紙筆良可輕

文信國空坑敗後致人書真蹟爲荇農閣學題

有序

書所言凡九事其首已殘闕舊楮淡墨作行草書乾隆中爲鮑氏
知不足齋所藏後入內府有嘉慶御賞及石渠寶笈寶笈三編諸

印今在長沙周氏

嗚呼信國不可作文章在世猶日星此卷淡墨數行字真氣蟠作蛟螭形
空坑一敗不復振展轉江嶠驅轅汀猶圖再引五更讖區畫兵事重丁寧
國有塊肉寄海上家已卵覆悲伶仃柳娘環娘盡嬌穉艸間百死求婆娑
其餘處分若暇豫催援止亂存朝廷犯者必誅死者惜儼然正笏持典刑

末署十月八日發景炎二年歲在丁酉幅缺蝕後完備餘力凜凜寒芒青
科名如公始不媿莫儔夢炎真鼠蛭賴有公及陳參政爲宋一洗龍頭腥
嗚呼公之生也與雲降沒乘大風歸帝庭此特殘札豈留意歷劫呵護神
猶靈焚香巾紙三太息想見雲車風馬空中經

題林和靖像視

有序

硯方石而凹右側有題識云殿直丁君自沂適閩艤舟惠顧晤語
未幾卽出硯相贈且以拙詩爲索勉書數章少塞好事之意然受
此有媿謹識硯端以記弗諼耳咸平五年歲在壬寅夏五月林逋
記硯背有和靖小像左側八分書云富平李因篤藏硯匣蓋刻潘
次耕行書題字近年鄉人倪署正某得之廠肆今歸廣東長寧令
蜀人葉大起

達人跡所顧獨喜翰墨名逋翁去千載世事無一嬰眷屬託梅鶴下此況
益輕摩挲有此硯愛之如瓊英銘識題歲月紀元五咸平且勒巾服像蒼
然須眉清得非手琬刻山骨臨寒泓殿直爾何幸留貽付佳評所重豈一
硯石友期堅貞想見西湖邊賓主相將迎扁舟橫隄下澹與谿烟橫梅陰
正如幄雨外斜陽生屐齒破山綠蘚徑導鶴行茶烟出竹屋微聞哦詩聲
汲泉還注硯脫手新篇成偶然記蹤跡彌見高人情

徐壽衡大理以林處士像硯拓本將致孤山再爲題詩

西湖處士亦好事一硯區區重題識其背自寫山澤癯想亦興趣適然寄
華陽葉子顛米儻土花石翠滿屋收一朝得此叫殊絕狂喜徑脫青鞵裘
長沙徐老癖文字爲薦浙材諦卿寺逢人猶說西湖奇欲標孤山補高致
巢居鶴去將千年梅花異代爭春妍不須耳孫互譏辯硯中神骨常儼然

何不以硯置祠側古月蒼烟不能蝕硯材萬億此獨傳附此并傳丁殿直

五月十六夜起作

五月苦煩暑夜起猶歔淫披衣臥庭際尺地成山林籬側轉微月澹然照
花陰時因楊柳風流光在我襟氣熱不成露夜靜能蕭森老槐峙門首垂
柯影沈沈時或車聲過警我同棲禽應知早朝客歎此蓬蒿深

五月十七夜四更有雨

炎威去以陰晚風在庭戶漸看月隙呈涼意生澄宇枕簟便可親花光淡
相竹中臥忽有警牀頭風葉舞歷歷穿樹聲已過四更雨田事豈不憂聊
欣滌微暑

五月十八日晚涼坐風前看霞寄絳丈

亭午暑轉盛微雷鳴西遐忽見林影動晚風來交加亟移藤几坐仰看柳

陰斜天際遲暝色對我生紅霞惜無雙酒杯映此漱澌花淺絳出層碧點
以三兩雅霞西是何處朱門丈人家想見倚筇坐金波泛新茶吟成定憶
我綠樹鄰牆遮

五月十九夜晚風盼雨書感成五十四韻寄周荇農閣學竝簡徐壽

蘅侍郎

疏傳樂休官董生感不遇雖曰隱顯殊各懷止足慮仕宦無捷徑寸阪窒
千步晚效徒強顏早達終失據木鴈非世憐枘鑿亦天付東鄰周侍郎清
華夙游豫逕回蓬島間未得赤螭馭一踐宮尹端旋曳鳳閣屢常參計臣
策間肄容臺故微疾喜遂告頤情恣墳素盛夏坐一室明窗絕氛霧寺看
香篆生硯池滴花露余亦秉微尚營級備三署虛竊一鍾祿不理五曹務
老成日以凋少年孰余慕芴闇名豈修清靜物滋妒昨者閤尙書安車起

農圃同官頗欣欣爭思自建樹矯飾廉讓名覲得上考託晚士善揣摹涼
熱皆可附慚非治煩才莫佐仰屋苦千秋違敢期三遷亦寧顧手版恆倒
持衙參久絕赴比日瘴癘熾祖謁略禮度薄粥二鬴充短榻四體布今夕
驅豐隆雨勢已東注頗疑惠然風來自公家樹追涼庭柯陰翹企碧雲暮
隔巷通蟬聲夕陽猶半駐四郊盼甘澤日憂旱苗仆農夫勤鋤犁泥塗雜
汗雨吾力能自勉治書刊謬誤持此報聖明差亦比耕作老更視息戒病
卽潔身去薄俗難具論嗟毗修怨惡不見黿鼉輩結網張要路鷗鷺互陰
嚇黿魚矜沫响趨足教險緣稟言習醉醺羣兒自相貴公然達章疏不畏
螳折臂行見蠅敗胆落落松柏行置身遠沮洳牀早僧真移扇無元規汚
古歡生寂寥真契在述著所嗟王益晉與瞿學士星奔一時朴林號下樓
烏水宿候續驚同業每銀離絕學致癘怒道在德不孤志定勢匪助開徑

三益來西頭約徐孺尙期杖策同消夏
鬪詩句南泝與北漚荷花最深處
此中可飲酒扁舟向煙渡騶卒及
罟師率意相與語紅衣褰風幔勾
留白頭住蕭然冰雪懷寧知穠纖趣

五月二十三日夜得大雷雨題荇農閣學所畫春江夜泊團扇再簡
荇丈竝用見示去夏喜雨詩頽字韻

連日作雨勢雲周天四積萍號忽震撼旋見重陰開一昨聞漸瀝承霑羅
餅蟹旣作亦復止蘊暑彌爆煥今日下明詔竹宮虔致齋分命具圭幣祈
澤徧九垓夕促屏翳駕急陣空中催注綆羃檐宇傾盆走瓴甕庭樹噤不
喧一碧湔松槐掣電裂金笑震地蟲驚雷萬物爭出濯四野聞歡厯適對
侍郎晝夜泊春江隈恍若置身際澎湃潮聲來風急渚火亂雨鳴沙響哀
菰蒲十萬頃白浪如山摧忽又憶昨夢一棹長江迴嚴城動譙鼓曲港收

帆梳篷窻通燈影密竿如檣排每當風雨至萬響轉轆轤潺湲滿枕吟耳
根洗塵埃遙見空濛中星魘佛影盪安得從公去五湖相溯洄飽聽楚天
雨出沒煙雲堆烹魚劈湘竹繫纜依老梅船頭對山色青笠同銜杯

送張仲模待講出守婺州

早鳴仙佩入文昌講幄紅雲侍玉皇雞足翹材窮蠶篠

君嘗典
試淮南

螭頭簪筆

出彈章一臆試最東陽守千里迎親夏首旒傳得金華殿中語喜鄰粉郡
有輝光

夏曉雨後偕霞芬出城入天寧寺

油壁同時出花隨載酒行蟬多知近寺塔迴不依城遠岫猶雲勢低陸足
水聲客來林雝喜與佛報新晴

偕霞芬坐天寧寺看山院

經壇松外午烟霏一院蒼苔客到稀近戶花香通翡翠簾山色趁羅衣
高粱夾隴茅茨隱遠磬穿林野鶴飛惆悵鬢絲禪榻側夕陽何事苦催歸
後十八日再至看山院題壁

夏晚高松涼經旬興彌永一徑轉花陰日午鈴語靜院寂不見僧滿窻納
山影坐久覺露香下撫禾黍頂

偕儒初仙坪叔平鐵香仲模爽秋由大寧游南荷花汧日落追涼是
日有游女飲池上

看山意未已言就納涼處微徑入野田水與馬爭路南汧富荷菱烟中有
人語招邀無主賓列坐當沿汧隄上楊柳風下埽蓮葉露斜陽忽到花知
是風開樹水榭臨紅妝綠窻隔紗霧暝色來池邊悵望碧城暮安得問鄠

令租我花間住

地屬豐
縣

夏晚借霞芬自陶然亭攜酒登南郭敞樓二首

把酒憑高俯玉京晚來雲物似秋清
林陰返照全歸寺山翠連空近撲城
飛鳥恰從圓扇落好風偏向荷衫生
康時多有登臨暇卻敵支頤話老兵
鬱蔥壇苑樹周遮清帶壕流一道斜
極望風煙郊寺塔萬重樓閣帝城霞
斜陽次第遙呈嶺暝色蒼深盡在花
幾度更矜腰脚健不須天際數歸鴉

夜坐卽事

積陰易云莫垂楊毳深屋微雨過荷上葉
定一螢綠迴顧枕簟幽新涼就
窻燭

子縝自湘南奉諱歸今年書來言以營葬故辭湘中書院之聘且分
束修爲饋卻寄

未竟星軺感素冠禮堂追想百年歡陶山力自營松柏湘水才多怨芷蘭

尚有門生知載酒獨憐遠道勸加餐一時風樹悲羣從霜露秋深雁序寒
羊敦叔自吳門寄惠書籍卻寄

鯉魚風起墜瑤緘佳事遙知吏隱兼山色青油晨挂笏鬢光紅燭夜垂簾
肯將握槩輸銅綬卻爲炊珠損玉籤來書以銀籤等數種屬友入易銀致余昨夢茱萸消夏
舫與君花裏醉明蟾

病起束紱丈亦小疾新愈

幅巾鶴髮有餘清藥後櫬輟試杖行十笏園亭娛晚節千家砧杵報新晴
詩心夜月比鄰共鄉夢秋山隔水明百尺蒼松淩雪見卻看蒲柳不勝情
病起簡敦夫敦夫亦患痢下新起

史館備書日曹郎立壁中階閒苔屐雨門接藥烟風幾見三旬飽翻來百
病攻牀頭杯渡傳危欲錫凌空杯渡道人傳言病痢而終

病起絨文書來謂余病後即能文詠當有無量壽符文書來謂余如
瘦松古鶴必長留天地深感勤勤期祝之意爲詩柬二老

少年交舊看將盡京國風流二老存坊巷東西鄰綠野往來箋牘滿蓬門

張蒼曾問蘭陵學

經典釋文敘錄言荀卿以左氏春秋傳武威張蒼考荀子及張丞相年皆至百餘歲前日得火書來言文人福

壽張文侯第一故及之

迂叟叨陪潞國尊自古經儒多壽考不須丹訣訪昆侖

送許仙坪備兵河北

太行東走襟黃河南陽沃壤經畝多畫分一道輶晉衛朱旗天半瞻峨峨
許君諸侯老賓客中歲金門始通籍乘槎直到牂柯江持節復窮玉門驛
苴蘭蔥嶺橫烽烟穴冰衝霧搜材賢歸來萬里悉在眼詩囊歷歷羅山川
翰林上考登啓事天子臨朝自除吏豫中大褻民未蘇特詔儒臣蒞其地
覃懷禹貢偁名疆鄴城六代割據強

魏曹氏後趙石氏魏冉氏燕慕容氏及東魏高齊

朝歌支郡

亦雄勝悉待一扇仁風揚方今朝廷啓俊宅星變求言主側席朱雲蕭育
生比肩嶽嶽爭抒救時策君茲奉命腰艾銀露帷行部雙朱輪嚴霜甘雨
隨所布要使疲俗沾陽春河陽旁帶六千石節度三城古方伯金隄屹屹
繫此身行見萬靈手加額黃華林慮天下奇蘇門百道清泉飛名山麗闕
盡宇下會當笠屐來相依

送施郎中啓紫出守興化

年少勤爲吏刑祥重列卿外家張竦學慈母義姑名

施爲崇溫甫師外孫幼失怙恃其度母孫

慈旗隆至潔白承先志循良起政聲會稽南部地畫錦擁專城

越縵堂詩續集第九卷

清會稽李慈銘愛伯譔

姚安由雲龍夔舉編

癸未四月五日夢舟行故里青田湖中樂甚醒而賦之次日是湖中

競渡日也

故鄉霞川水南匯青田湖湖周七八里四浸山菱荻其中多曲港夾樹楓
柏株霞川爲運河帆檣如驚趨過橋入湖口頓覺心神殊清光啓明鏡千
百螺鬟梳緣隄富蔭芡亦種紅芙蓉麗景四時足鬱爲神仙都昨夢駕一
葉駛入烟波區其時旭日出金翠相卷舒漁舫正四散點綴鷗與鳧樹色
蔚若薺下映澄練鋪嵐光滴曉露浮青滿衣裾顧之忻然笑身復入畫圖
栩栩忽以覺蒼碧猶能摹始悟明日事競渡相嬉娛龍舟狎翠浪出沒跳
驚魚汀花岸草間時時拂旌旗川驛織錦繡酒國開粉榆時適田事隙清

和當夏初年少隨里集此樂長無渝安得附翼歸簫鼓趁邨墟

坐藤花下作

種藤十餘年其高覆我屋縛架日以長布蔭滿庭墊年年春夏交垂花若
毵絢艷散終朝霞風搖四阿馥設几坐其下攤書字朱綠時見落英墜丹
粉相句讀小鳥或經過綵繚響珠玉徑宋無人行惟見蠹蟻逐夕陽戀餘
映清露喜朝沐家人顧笑我謂此非適軸辛勤作寓公種此竟誰屬余謂
人生寄但取眼前足我種我譽之人花兩爲福不見平泉莊未得一朝宿
吏部非昔陰寄園泯蠹闕漁洋暨竹垞佳事此其續後人想風流定入退
朝錄

得曉湖司訓龍泉書卻寄

籃輿垂老見風流佛影經帷兩白頭澗水西來通頻沼閩雲南起對書樓

一困官粟供山縣

來歲首歲入穀三千斤米三百石

千里鄉程入劍州

龍泉宋時曾立劍州其地有斗入福

建浦城縣者閩中故有南劍州之稱

何日各成歸隱計湖塘壽勝結盟鷗

贈同年黃仲弢編修

紹興

今皇三榜啓庚辰同籍同年廿五人君有才名傳世學我於交誼倍情親

汗顏李邵辭華選作賦黃滔絕等倫

庚辰朝考第一今年散館復第一

報國文章原易事

無雙江夏出貞臣

偶題江邨古木寒鴉小景二首

小幅江邨景最幽幾間瓦屋俯寒流稻蓬斜照低眠犢淺罨輕烟欲渡鷗
水檻平看遙岸樹風帆峭帶數峯秋歸鴉似與吟情會蕭瑟蘆花寫莫愁
廿載江鄉繫夢思鏡湖紅樹雁來時墟烟淡上叉魚艇山翠寒侵放鴨池
略約晚霞都入畫遠邨疏柳亦宜詩不堪俱作承平憶待月柴門閉每遲

癸未六月京師苦雨有柯山戚友來與談故山之勝適吳編修講索
書團扇編修故家州山與柯山鄰也其地山水尤佳因題其扇二首
吾越山水窟西南尤翠岫道出湖桑墟窈窕如美人曉鏡滴眉黛淡笑無
含顰時花簇巖際螺鬟亦爭新流鶯呀雲裏偶出銜紅巾誰家好樓閣嵐
光浮碧筠朱闌一倚笑溪聲千古春

春山固云好尤愛初夏妍綠陰已如幄餘花綴連錢自入第五橋夾嶂飛
清泉州山最秀絕圖經名弗傳我於甲寅夏落日嘗放船金碧深色畫絳
麗參諸天濃黛窅無際極目惟蒼煙此景刻胸臆息壤期何年

近感二首

聞說昆崙外干戈尙未休周藩勤職貢漢郡本交州俗自曲羣美人思悉
恒謀蛟涎何日饜前事有流求

未有填隄術先謀築室人九河隨處指三策任心陳斥地噉新進增卑主
重臣魚鹽千乘富畢計集莢薪

癸未六月之末連雨猛甚牆屋多圯二十九日得晴戲書一絕

西風一夜免排牆又送蟬聲過夕陽飯後不知明日事樹陰移榻飽新涼

同年朱桂卿編修用山谷上蘇子瞻古詩二首韻見贈用山谷次韻

補之廖正一贈答詩韻報之

世間萬事競雞口枳屑散材論升斗蒙然雲霧擁九關雞犬舐釜丹大還
天馬蹄躑躅棧屹下黃鐘瘖啞邨饒聞朱游氣概萬夫上雍門一遇獨心賞
庚辰之榜天下名輝煌桃李春滿城君對大廷擢高甲稽古所致無凡榮
我亦躑躅隨貢士漫郎仍署聲隅子入刺屢索閣人還拄笏不爲長官喜
朱弦三歎知音難少年吹笛工譏彈晨星數點相嫵媚寒松千尺誰躋攀

自慚凡骨不能換看君游戲蓬萊山

胡匡伯以與朱桂卿酬唱詩見寄中有同事李夫子語再用山谷次

鼂廖贈答詩韻酬之竝賀令嗣毓麒登第出宰滇南便道歸侍

以田易官贍八口垂老始能博升斗口中無齒髮被肩經年車轍絕往還
銷聲自匿百僚底潛精亦敝羣書間看花偶出雒市上濁酒素箏一時賞
胡君鄉里最有情十年同住長安城歲寒松柏自相悅不隨桃李爲枯榮
別去三稔復來止眼前突兀見驥子雛鳳一鳴天下驚萬里除書鵲聲喜
少年民牧良是難朱琴先向書城彈泥金已足動鄉國五雲喬梓爭援攀
作吏何如鄴下樂且侍鉛槧勤名山

感都門近事答桂卿四疊山谷次鼂无咎廖明略贈答詩韻

世事到前總緘口但願肘間印如斗四塞以外紛觸蠻日望玉門生得還

東南一侯西北尉何如移置眉睫間白面少年書累上禁幄頗聞屢倂賞
常僚驟擢躋公卿或馳虎節莅百城朱厓棄地師賈策阿佟駁議無周榮
我曹竊食百僚底不能去逐元真子著書相戒絕罪讒高歌互答寓憂喜
清流湛湛無激湍修竹寧受甘蕉彈老樹著花白嫵媚孤桐半死無援攀
君不見十丈東華輭紅外照人爽朗有西山

京邸秋晴寄懷彤山人楊雲癸吳下

秋風起庭柯曉日在窻戶郊畿徧積水黯黯市月雨自今喜得晴西山納
我宇因之懷故鄉家家熟禾黍金粟香風巖紅蕖界烟渚楊子湛冥徒長
年賃皋廡薄田尙可耕胡爲久羈旅彤山萬竿竹烟深憎無主壽勝好壻
鄉三里通一浦時當春秋交往來簷船舫山妻安紡車稚子理釣罟清谿
動林影仙眷盡吟侶嗟我無家歸亦冀息倦羽會當鋤白雲荷雷從學圃

簡朱桂卿五疊山谷次旡咎明略贈答詩韻

黃流倒注礫谿口石水難勝泥六斗腐儒不知時勢艱高談欲挽河南還
齊東士夫惜地力束之北注瀛莫閒朝廷焦勞竭內帑畚土未得一錢賞
況今陽侯屢震驚畿輔巖巖無完城未聞尹忠責疏闊但有延世希褒榮
浙中海颶吹鬼市居民萬家作魚子使者告災恐主憂惟言秋禾翠堪喜
君家武原古鹽官揚旒東渡一指彈秋深相期剡中去板輿紅樹堪扶攀

莫問橫流徧南北聽泉洗耳雲中山

海鹽與上虞隔海相對近有風潮之變朱君母夫人移家鹽水故爲剡中

山居約云

題王石谷畫停車坐愛楓林晚詩意

歲有月自畫於虎邱精舍

往聞離華勝秋色踰春妍

耕烟畫離華勝秋色踰春妍

茲圖更明瑟冷豔無浮鮮詩寫

小杜意身落中吳天細磴冒白雲疏林界清泉點綴在靜深蕭森出豪顛

霜紅借落照晚景俱來前自惟巖壑僻霞采尤所憐鏡湖十萬樹處處可
放船水窮入林去夾嶂如錦懸何時畫中屋落我秋筇邊隨意置籬落錯
雜松與楸上以環先壟下自營墓田坐對不知返庶幾息殘年

同年沈子培比部

晉植

次山谷用鼂廖贈答韻見贈且約重九之遊

六疊前韻酬之并柬令弟子封

人生難得笑開口壓帽黃花大如斗古重此節良可歎東流之水何時還
百年能作幾重九聖愚一坵炊黍間吾曹不幸落塵鞅濁酒狂歌自相賞
百錢挂杖萬事輕幘幘徧縱長安城詣曹聊亦逐蕭育覓伴何可無公榮
柴立中央孰牛李富貴紛紛八關子痛飲遑顧尙書期高論寧知府公喜
置身幸未矢在弦有琴不受王門彈城南地僻少官府寺樓處處堪躋攀
樂時當得一日醉爲約君家大小山

癸未九日偕爽秋攜酒邀同年朱蓉生黃仲弢梁星海三編修沈子

培子封兄弟集崇效寺餞孺初歸文昌

今年積潦彌郊坰僊陽玄月猶驕蒸強名重九作高會分曹賭酒吾猶能
袁絲勤吏兼好事日治官書夜文字謂我送別兼登臨淋漓詩酒實職志
逍遙潘叟南荒賢賞郎七十髮被肩一朝掉頭欲歸去笑看鴻鵠橫秋天
與君同作司徒屬不肯抱關常錄錄世人隨俗爲毀譽誰向窮途慰歌哭
朱游言事氣慨恍黃香東觀偁無雙梁竦英英出南海吳興二沈皆瘦狂
白紙坊南崇效寺傳自有唐劉濟置朱樓十丈掌秋空藏經猶出前朝賜
嘉靖三載苗宮人手題貝葉華嚴文

是日登藏經閣內華嚴卷尾有
嘉靖三年七月宮內信女苗氏敬施

字
閑黎貧老失年代鐘魚過盡楸花春大雄慈力亦何有今日一尊落吾

手眼看身世如浮烟祇有青山未衰朽染須大半事後生那有虎賁思典

型草木搖落鳥獸怨雨雪將至天地冥送君且盡此中酒時事不須復開口斜陽肯爲吾輩留曠莽郊原一回首瓊海萬里鯨濤程樓船帶甲南交行祝君安歸長子孫長爲王人輸稅耕

題傅節子華延年室金石拓本卽送其赴閩補官用冊首朱椒堂侍郎題金氏咸悅齋鐘鼎款識次飲丁香花下作韻

有華延年日鑄黃矻矻一室有底忙官貧家罄俱不計吉金樂石生輝光鍵戶惟聞碰揚響發篋欲飽尊彝香我始識君道咸際其時年少氣發揚買書鬪富極精力對酒論古傾肺腸方謂百年盡此樂錢錢越紐無去鄉晴窗翠墨春日澹燈花簷雨秋宵長中間離別更兵亂歸來上壽無北堂君走楚閩我京國鬢髮各已成老蒼沈沈溷跡百僚底入賞聊博升斗償君歷縣劇擢五馬南天頗已成甘棠今年入都更相見秋雨打頭驚壞牆

亟營一弓下榻地冀連日夕傾百觴落葉蕭蕭復言別欲留驪駒無舊場
幸君金薤日益富囊人衣珠如欲狂何年抱冊共歸老種菊釀秫過重陽
癸未十月二十九日寓齋菊花始盛點鐙觴客卽餞朱桂卿乞假歸

省北堂桂卿復次山谷用鼃廖韻志別七疊前韻酬之

金門隱居儼谷口量粟論囊酒論斗廿年不調五品官猿啼鶴怨客不還
力營隙壤作籬落置身常若山林間三徑霜風埽秋莽西嶺翠來暫供賞
展重陽後十日晴黃花盆盎堆書城據梧暝坐不得意欲向畏壘招南榮
吳越之間幾瓊士公叔英英照餘子醇醪不敵清言溫空谷自爲足音喜
明眸行酒敲玉盤不須雜遘箏琶彈燭花數跋四坐散路河秋柳明當攀
君歸正及香稻熟宮花上壽廣南山

袁爽秋以冬夜直理俄館賦詩見懷竝謁館中卽事四絕句酬以二

首

自笑人間七不堪那知轍北與轅南龜形爭見全藏六臧耳何須說有三
偶與高門無字刺亦聽海客大瀛談一瓢尙仰天家粟許結東鄰恐未甘
絕倒袁宏作奏工一官蠻府寄壺中心殫筭編平準牒領山川極大蒙

君近爲聞尚書編國計簿又鳥語戲聽夷隸譯竹聲清引越吟風中君東陽

之有勝石卻思九里梅花舍多待桐江理釣篷

病中待雪寄沈子培子封兄弟

與病浮休自在眠溫鑪擁褐過殘年方書肘後橫斜草經卷牀頭繚繞烟
半畝山林如世外多時雞犬亦神仙遙知待雪珠巢巷臘酒梅花起誦弦
書感次子培柬余病中韻再際子培

何曾當道臥王羆電掣明駝十二時下瀨樓船徒設險叩囊金匱已無奇

胸中華嶽晨澆酒夢裏昆侖夜出師日食猪肝吾事了不須垂齒樹臣而

嚴鹿谿自返入都以魏齊碑數種爲贈時寓丞相巷僧寺酬之以詩

嚴子關中溯洛歸行囊多打北朝碑一官仍署司徒屬半榻新依佛火炊

落葉積時敷坐具暝鐘有意繞經帷向禽劇甚烟霞約五嶽何年策杖隨

和雲門見贈詩韻

一去蓬瀛更愛閒暫從冬集選人班居僑京國無名寺時寓虎坊橋東萬壽寺

寺者殿阿古舊是安無名小看徧南朝著色山此來徧遊楚家世自傳文武

略才偶兼在俠儒間歲寒寂寞常相慰莫爲長纓請出關

癸未東坡生日竹簣雲門見過夜留小飲再次雲門韻

鶴飛曲裏過冬閒珂繖稀隨半仗班小室飄香千日酒寒林燈影一房山

語參許掾烟霞外文在樊川伯仲間故事從容三白飯琉璃七箸不相關

癸未生日竹簀書玉介唐光甫秋田雲門醪筵爲壽賦詩志懷

今年百病攻腐儒何暇謀樂惟憂虞麟閣禮堂兩未就已看斜日侵桑榆
爆竹漸緜臘鼓急案頭殘歷賸三日同人知我覽揆辰醪錢二萬祝增勳
城東小史斟流霞金屏寶勝香爲家春鐙璀璨玉闌角蜜梅四照人如花
玳筵樺燭映眉嫵徧酌銀罍佐行脯自知醇酎輸清談何事黃金買歌舞
南交十萬屯邊兵黑山苦戰都護城大帥椎牛自行賞笙歌高擁中軍營
況復黃流十州沒層冰峨峨萬人骨須知移此一醉資足濟百家一朝活
諸君相顧意氣真半登館閣稱近臣或屈朝官作民牧蒼生責望行在身
慈也衰疾已頭白行就諸侯作賓客出門一笑雪滿天明年斗米易錢百

越縵堂詩續集第九卷

南通出 謝翰飛校

越縵堂詩續集第十卷

清會稽李慈銘愛伯譔

姚安由雲龍夢舉編

甲申元日東周荇丈

公今開八髮垂肩愧我遲生十五年已歎櫟樗形悴甚始知松柏色蒼然
四朝老見中興日二品歸無半頃田手定等身三史學桑榆光滿楚南天
甲申人日荇老枉和元日詩韻用高常侍人日寄杜拾遺詩韻再簡

荇老次日立春

沅江無地營茆堂十年致政留帝鄉閉門過冬息老物五千文字能撐腸
白雲變幻一無預閒理琴書消百慮人日枉和歲朝詩想見花飛墨凝處
明朝又見甲申春紅梅壓几清無塵須令世上小兒識百歲金門遊戲人
甲申三月十三日出都小住津門四月三十日還京絕句五十首

一自乘槎到日邊不知官簿幾推遷閉門日月今多少記種垂楊十四年
果巷西連米市斜巷南老屋當浮家敏門絕少公庭吏長有園丁報送花
喜讀朱公種樹書一庭花竹漸扶疏路人指說牆頭杏此是當今庾信居
絕倒虛名比郭隗故將羔雁款蒿萊山桃似欲留人住獨向春風冷處開
似說皋比拂坐塵昨來雙鯉下通津郎中三影關何事一語胡盧足了人
管領山奴赤腳蠻一門僕婢仰眉端邇來始信京師大容得聾隅五品官
自課長罌汲井華丁香含萼柳初芽白頭尙領春光幾剛及花時不在家
夢裏山陰一畝園老來賃廡傍修門須知白柄長錢外生計都無一事存
平生營構愛精嚴茗鼎書牀事事諳想到白雲帷帳語那知硯北更香南
東頭屋倒自成園縛架編籬也自寬雞犬不知人賃廡花陰鳴吠各相安
跛驢薄笨告臨歧丁倒圖書閒酒甌一幅青門真祖帳山妻扶杖病姬炊

丁卯才華錦不如玉堂宣講待熏爐他年編到題襟集一首文成萬顆珠

許竹莒侍講
贈序甚佳

風義長條擅俠名鳴琴百里動邊聲臨行笑約垂楊說待我歸來唱渭城

門謂雪

漫郎相顧各蒼然少壯論交老更憐腹痛逍遙潘叟語今朝喜見傅延年

謂子幕去年正月三日潘跋庭文過余遇子幕喜
曰新歲見傅君延年之兆也時去文致十餘日耳

伯玉文推禁省雄歐陽三娶事偏同一經欲慰商瞿恨故遣佳兒祝草翁

陳書玉編修其夫
人錢呼余爲父

酒債時時貰玉嬰虎坊橋北屢經行韓家潭畔朱霞影小別東風也有情
道出東門賭茗杯觚棱回首一徘徊年來朝事營營甚負手城闔聽水來
誰言清淺是蓬瀛時有風波起玉溟陞楯歲星方一覺層城二度換真靈

可笑當年呂步舒五行平議事何如豈真朱鳥窗窺得先遞青桐一葉書
豈有連錢避障泥故教迂轍轉東西老農新碾春疇熟一片柔茵待馬蹄
斜日停車定府莊風吹村店柳初黃卻憐一出長安道每見青帘覺酒香
已看明月影當頭八里橋邊水自流郵吏排籤行更急滿街燈火過通州
郭門繚繞俯平川塔影依稀遠帶煙十里檣竿旗獵獵一燈初下潞河船
夢醒依約水聲撞曉日瞳矓照竝艖婦女隔船相問訊祇無吳語到篷窗
道出泉州有潮城署師馭子掠舟行煙波安穩平生夢欹枕明窗聽榜聲
野岸星沈繫纜遲林中犬吠有茅茨客心悵觸孤舟夢四十年前夜泊詩
余十六歲時冬夜侍木生王父自樊浦歸舟遇風泊石渡賦詩有云雲
鐘鳴知野剎林中大吠有茅茨又云燈從樓下出風穿樹船與斷冰爭過橋
其稿久不存矣

張灣南畔改新流直接香河減水郵知有船孃偏愛惜別開明鏡照梳頭

三五成邨映柳林征塗漸次覺春深如何纔茁鵝黃葉三日青青徧綠陰
堤入楊邨覺漸高稻秔綰穀萬吳舫幾南文物徵何限只說朱家雪字糕
曉卸征帆丁字沽新營壁壘扼津衢和門鼓譟花門角此是華蕃合樂圖
趙侯五十早專城說士時時到禰衡廿載題名同白首喜分輿蓋遠相迎

柳孫以庸
與來迎

百戰功成使相尊海師十萬虎貔屯令嚴夜半傳軍號不許潮來碣石門
洱海新傳逮仲通樓船楊僕總無功漢家銅柱標天半未盡朱戡入界中
都護安南舊有城未聞墨守已投兵誤人一紙行師地莫似唐家怨蔡京
六詔烽煙接點蒼誤傳銅壁作彭亡唐蒙鑿空真何苦緹騎飛龍過夜郎
日夜颺輪驚報來春風依舊講堂開頗聞舍菜迎師暇出看犀軍演水雷
勃海經師著漢京駕湖題額尙崢嶸如何七十三年後輪與南州獨擅名

天津書院創於乾隆二十四年盧雅雨先生任長廣運使時議香樹尚書人
學海棠堂額後至嘉慶二十四年阮文達總督兩廣始開學海棠堂於廣州香人
不知津門有此名矣

雅雨風流久渺茫列葭環海屢生桑談經幾輩松枝塵祇有雙槐閱世長

院有雙槐軒

東海鱗魚舶棹登細鱗盈丈雪花凝軍中知是先生饌驢騎飛傳一棹冰

國賦合肥相國賦合肥相

吾家寶鼎號儒宗愧繼先賢領學僮使者雍容車騎美雅歌賓主禮三終

二十日借運使額勸清額
君率諸生釋奠兩書院

東風紅紫出新裁雪柰緋桃次第開消得三蕉藍尾酒天津賢令送花來

謝縣令陳君以塔景
海棠棠桃各兩樹

蘭陵繆襲領官書隔院牙籤甲乙廚卅載泉明風木感覆巢流淚話銜鬚

深陽人武烈公以醫術江運使殉戍中杭州之難

金花寶蓋滿城中浴佛先期賽謝公猶說裂裳馳一騎大呼殺賊渡河東

津人歲以四月六日至八日宴會城隍神及故天津令謝忠愍公子澄祠中燈樂晝夜不絕旌旗簫鼓構迎其盛

庭前日敷綠槐芽燕雀相依共一家忽覺天涯春去盡隔牆風裏見楊花

開到庭中安石榴連朝山信報花稠華筵次第開賓館再作平原十日留

汪使觀察君天津道劉觀察樹棠梅閣道周觀察趙君柳日股款汪君守正長蘆運同沈君永泉及桐孫恆菴諸君

夜下船符三汊河又聽擊汰榜人歌揚帆直出桃花口歸路清陰一倍多

周玉山觀察具舟送歸

隴麥青青覆黍秧桔槔礪磴一時忙東風五兩乘飛繞脫帽船頭看夕陽

新河繞過有風靈未到張灣急繫船雨後遙天青欲滴夕陽一鷺下前汀

策馬雙橋二閘邊沿流樹影綠連天入都更有江湖思放鴨紅裙六柱船

日落爭城趁晚鴉遠看高柳出簷牙可憐越客安燕久但認長安是到家

六月七日同人出城至南荷花汴餞雲門遂泛舟花中至日暮而歸

廣寧門外多林籊桑乾隨處泉源穿居人瀦水種荷芰南灤北灤名爭傳

土人呼荷花汴子北花汴子汴卽音之轉也

南灤花深更林密汎水有舟飲有室樊子觸熱將

西征相約同人載殺出綺窗三面皆當花玲瓏舟屋如浮家酒氣薄花萬

香迸花光入水蒸紅霞荷葉裁裙翠羅色環佩琤琮午風織新妝誰與花

爭妍一水迴舟作香國朱郎宛宛雙翠蛾玉缸爲我斟紅螺窈娘善舞躡

利蹤翻身玉鶻凌金波

皆是日飲同本

眼前快意莫輕擲一醉千金亦何惜烽煙

炎海日百驚流汗殿廬視駒隙謀國有人無我譏日落柳風吹葛衣刺舟

更入花中去月上煙深一櫂歸

後十日光甫招集陶然亭餞雲門

相攜蠻榼就郊垞野寺江郎舊有亭萬樹自銜孤塔出遠山不隔帝城青

昇平官樂生何幸

康縣中江漁侯工部臨此亭

老病愁多酒易醒最是玉人能惜別卷

簾長得夕陽停

再後十日齋中坐雨適雲門詩來即用其韻

閒庭積水寫微波簾隙愔愔上綠莎花裏房櫳催暝早柳邊窗几得秋多

離襟河曲千重嶂

雲門所爭宜川在龍門孟門之西

歸夢山陰一領簑卻想北湖樓下飲

快看驟雨打新荷

一昨有十剎海飲酒泛舟之約

雨中聞蟬有感

一雨新涼已滿城秋蟬猶趁樹間鳴垂楊掠亂千枝滴爲爾頻添斷續聲

聞馬江之敗三首

誰揖開門盜虛乘下瀨船單身亡節鉞六館殉燦煙露布猶馳景鍾官曲

賁錢始知誅馬謖流涕武鄉賢

獨闢盈廷議軍諮屬老成廿年持節監百練習流兵儲庠徒齋盜飲飛盡
結纓自強原有術屯戍重農耕

爭望黃龍艦清河是水神旌旗團黑霧山海亂青燐見敵思劉秩臨危愧
令贊八閩天險地太息付斯人

再酬爽秋詩道會稽富春之勝

富陽至桐廬山水世獨絕每誦叔庠書行間見崢嶸余生會稽郡百里卽
漪江屢問錢唐渡未買富春艤君生桐君山每談九里勝層林蔭深潭蒼
翠若可聽睦州隸於浙東西無定尊君之扁所居偏曰漸西邨越州統浙
東巖壑實尤異佳境隨步變麗矚四時備比居秋氣至蒹葭彌平川松竹
相映發雲霞交澄鮮巖桂初過黃江楓亦漸赤浦帆出煙晨寺鐘澹霜夕

安得綰五兩與君窮幽妍朝發剡谿日暮宿嚴灘煙碧照魚行空紅分鳥穿樹笑謝京西山翠微鎖寒霧

日本仙台人岡鹿門名千仞字振衣舊直史館來遊中國持湖北人楊惺吾書介鄧鐵香來訪於其行也持絹索書爲詩三首送之

萬里行歸國三秋氣正高魚龍看戰鬥詩卷壓波濤月照雙輪艦霜飛百淬刀中華山色好蒼翠上征袍

自愧蕭夫子文章海外通身閒征戰後詩富亂離中談笑無西極衣冠見古風所嗟逢老病尊酒莫相同

足利千秋學傳多古本藏況君精乙部此業冠東方

著有法蘭西志米利堅志又欲撰英俄普

三國志已屬草

系纂吾妻鏡經馱大寶王仙台舊雄鎮碑版有隋唐

題揚州李梅生有焦山圖儀徵嚴鹿谿所贈也

平生兩見焦山面未及尋僧一曳筇聞說雲泉滿松桂參差樓觀隱芙蓉
吾家自寫胸中壑逸侶相貽壁上峯安得聳身蒼翠去夜潮落葉打秋鐘
甲申十一月初十夜展讀符丈秋暮手書數通泫然成詠時丈化去

十二月矣

朔風燈冷夜窗虛展讀平生一紙書隔巷相憐人臥病九秋還慰客無魚

一書是
鼠魚題心傷索畫明年約兩書皆寄畫屬有云所畫甚拙惟恐自貶不能
再畫或有明處當別畫一題以補過公其許我

平腹痛瀕危半面疏我抱沈疴公已去黃壚相憶定何如

寒冬夜坐閱赭畫山水箋宛似故鄉西偏小邨落題之以詩

翦燈寒夜一攤箋忽覺溪山落眼前小艇渡人疏柳下幾家臨水夕陽邊
參差林影浮漁罾次第峯痕界野煙歸夢欲尋江上屋梅花籬落隔巖泉

追題遊東關天花寺詩

有序

放翁老學庵筆記云會稽鏡湖之東地名東關有天花寺呂文靖
嘗題詩云賀家湖上天花寺一一軒窗向水開不用閉門防俗客
愛閒能有幾人來今寺乃在草市通衢中三面皆民間廬舍前臨
一支港與詩不合豈陵谷之變遽已如此或謂寺本在湖中後徙
於此嘉太會稽志所言略同余於戊辰之冬嘗一過之寺門閒靜
近依水曲旁絕塵市亦遠衢術與白塔洋相隔里許疑無湖中移
置之理至賀家湖者今日賀家池在樊浦東離寺甚遠呂公北人
故不深知也然其詩境佳絕近久客都下煙水夢深彷彿疊觀補

題長句

廿年前櫂入東舟曾向天花寺裏遊市轉碧橋開靜野牆欹紅樹照寒流
四圍稻葉常遮屋一院松風自繞樓誰向招提問興廢山門長占鏡湖秋

東關白塔洋長三里
餘是說湖之僅存者

書先莊簡公千巖亭詩後

有序

先莊簡公紹興中罷相以提舉洞霄宮還居郡城新河嘗遇陸少
師宰千巖亭賦詩云家山好處尋難徧日日當門只臥龍欲盡東
南岩壑美須來亭上小從容慈銘平生喜誦此詩乙丑還里賃廡
新河者兩載後移寓錦鱗橋則臥龍日在戶闕矣比年久羈郎署
極念故山甲申歲闌寒夜多思謹題五言一章於後述祖德志息
壤焉

我祖南宋英罷政守鄉郡遂定新河居千載想餘韻同時陸祕閣始築千
巖亭放翁尙童丱授詩聞過庭時見相公來青山在眉宇白雲不可贈相
招白雲語藤州忽赴謫遂落瓊海邊仙山一家樂事見
谷雜記化鶴無歸年至

今清風生近接水澄巷第宅多新開市樓絕霞絳余也一廬賃兩見河水
春時尋古松石想見峨冠人龜堂久已平快閣亦非故只道三山間猶有
東園樹薄宦去鄉國欲歸無寸田何從乞祠祿況求一郡便寒夜靜煮茶
凍窗聞竹折夢載梅花轡探徧山陰雪猿鶴蕙帷寒峯峯積翠閒翻思錦
鱗里隱几臥龍山

甲申生日書玉敦夫介唐三編修光甫戶部攜酒見過夜張燈召樂

與諸君飲卽席賦呈

修幹無恆期況復百憂集侵尋迫崦嵫生事無一立幸有君子交素業欣
所習偏念縣弧辰覓然會車笠玉缸樺燭明玳筵蕙爐襲雙花行金尊細
樂綴笙什平生苦黠視蔭每汲汲吾降逼歲闌人事尤屈屢謀此頃刻
娛懼有鬼神竊頗聞北戶下臘鼓催戰急傳烽及甘泉四海驚滄溟戴面

朝登壇帖耳夕就罽藥街虛鄧支葛亮盡帶汁卅里明光甲無由買曾級
詭道詐捷書踰限斷履報終南未爲工柱下此可執諸君在承明耐寒不
肯翕雅尙如墳齷澁冥共鄉邑相勸一尊醉毋效耳語聿十笏茆堂寬梅
花洹煙溼酒香燈四圍風雪豈能及翠袖手可溫青山夢先入萬物翹春
蘇吾學蟄蟲蟄

甲申除夕懷雲門宜川卻寄

龍門西去控三秦獨擁山城爆竹春那有梅花通驛使喜添柏葉頌闌人
縣朝法酒三正樂官閣香匳百福巾知爾今宵能念我歲盤燈照髮如銀